

Okushwekuurwa

kw'Obusingye Mushanju bw'Ekanisa

Eshuura y'Okubanza

Okushuuruurwa Kwa Yesu Kristo

Okushuuruurwa 1:1-20

1. Ebyashuurwirwe Yesu Kristo, ebi Ruhanga yaamuhairwe kworeka abahuuku Be ebyabaire nibyenda kubaho juba, Nawe akatuma maraika We kubimanyisa omuhuuku We Yohaana,

2. Owaahamize ebi yaareebire byona eby'Ekigambo kya Ruhanga n'eby'okuhamya oku Yesu Kristo yaahamize.

3. Orikushoma ebigambo by'obunabi obu aine omugisha, kandi baine omugisha abarikubihurira, bakata omutima aha bihandikirwemu; ahabw'okuba obunaku buri haihi.

4. Nyowe Yohaana naabandiikira imwe amakanisa mushanju ag'omuri Asia; nimbendeza embabazi n'obusingye ebirikuruga ahari Ogwo Oriho, kandi Owaabaire Ariho, kandi Oribaho, kandi ebirikuruga aha Myoyo mushanju Eri omu maisho g'ekitebe Kye eky'obukama.

5. Kandi ebirikuruga ahari Yesu Kristo Kareebi Omwesigwa, Omujigaijo Omu Kuzooka, kandi Omutegyeki w'Abagabe b'Ensi. Ogwo otukunda, kandi owaatukomoroire omu bibi byaitu n'Eshagama Ye,

6. Akatuhindura (abakama) n'abanyamurwa ahari Ruhanga We kandi Ishe, Aheebwe ekitiinisa n'obutegyeki ebiro byona. Amiina.

7. Reebe, Naija n'ebicu, kandi eriisho ryona riryamureeba, n'abo abaamucumitsire; n'enganda zoonza ez'omu nsi ziryaborooga ahabw'okwija Kwe. Eego, Amiina.

8. Niinye Alufa na Omega; (obutandikiro kandi obugarukiro), nikwo Mukama arikugira, Oriho, kandi Owaabaire Ariho, kandi Oribaho, Ow'obushoborozi Bwona.

9. Nyowe Yohaana mwene waanyu, okwataniise naimwe omuri Yesu omu busaasi n'omu bukama n'omu kugumisiriza, nkaba ndi aha kirwa Patumo, ntuzirwe Ekigambo kya Ruhanga n'okuhamya ebya Yesu.

10. Aha izooba rya Mukama nkaba ndi omu Mwoyo, naahurira eiraka rihango nk'ery'enzamba enyima yangye,

11. Nirigira riti: (Niinye Alufa na Omega, Ow'okubanza kandi Ow'aha muheru). Ebi oraareebe obihandiikye omu kitabo, okyohereze amakanisa aga mushanju, eya Efeso, Sumuruna, Perugamo, Suatira, Saadi, Filudelfia na Laodikia.

12. Ahonaaho naahinduka kureeba owaabaire naagamba naanye; ku naahindikire, naareeba ebikondo by'etabaaza mushanju eby'ezaabu,

13. Kandi ahagati y'ebyo bikondo hakaba hariho orikushusha Omwana w'Omuntu, ojwaire ekijwaro ekihikire aha bigyere, kandi ayezirikire orukoba rw'ezaabu omu kifuba;

14. Omutwe Gwe n'eishokye Rye bikaba nibyera nk'ebyoya by'entaama, nibyerera kimwe nk'orubaare; amaisho Ge gakaba gari nk'endimi z'omuriro,

15. Ebigyere Bye bikaba bibyengyenyeta nk'omuringa ogushemeziibwe omu iziiko, kandi eiraka Rye rikaba nirihoorera nk'amaizi maingi;

16. Omu mukono Gwe gwa buryo Akwaitsemu enyonyoozi mushanju, omu kanwa Ke haarugamu rurara ey'amoogi abiri, kandi ahamaisho Ge hakaba nihamurinkana nk'eizooba eririkujwisa amaani.

17. Ku naamureebire, naagwa aha bigyere Bye nk'ofiire. Kwonka Yantaho omukono Gwe gwa buryo naagira ati: Otatiina; Niinye w'Okubanza kandi Ow'aha muheru,

18. (Niinye Ogwo obaho); Nkaba nfiire, mbwenu Ndi ohuriire ebiro byona, (Amiina); kandi Nyine ebishumuruza bya rufu n'okuzimu.

19. Mbwenu handiika ebi waareeba, ebiriho kandi ebiribaho bwanyima.

20. Amakuru g'enyonyoozi mushanju ezi waareeba omu mukono Gwangye gwa buryo, kandi n'ebikondo by'etabaaza mushanju eby'ezaabu, ezo nyonyoozi mushanju nibo baamaraika b'ago

makanisa mushanju, kandi ebyo bikondo by'etabaaza mushanju nigo makanisa mushanju.

OKWANJURA ESHUURA Y'OKUBANZA

Okushuuruurwa 1:1-3.

“Ebyashuurwirwe Yesu Kristo, ebi Ruhanga yaamuhaire kworeka abahuuku Be ebyabaire nibyenda kubaho juba, Nawe akatuma maraika We kubimanyisa omuhuuku We Yohaana,

owaahamize ebi yaareebire byona eby'Ekigambo kya Ruhanga n'eby'okuhamya oku Yesu Kristo yaahamize.

Orikushoma Ebigambo by'obunabi obu aine omugisha, kandi baine omugisha abarikubihurira, bakata omutima aha bihandiikirwemu; ahabw'okuba obunaku buri haihi.”

Omuhandiiki (atari ou bikomookireho) ow'ekitabo eki ni Yohaana orikwera wa Ruhanga. Ab'ebyafaayo nibaikirizana ngu akaturaho omuri Efeso ekicweka ky'aha muheru ky'amagara ge, n'obu omu bwire bw'okuhandiika ekitabo eki yaabaire ari aha Kirwa kya Patumo. Ti byafaayo by'amagara ga Yohaana, kureka n'Okushuuruurwa kwa Yesu Kristo omu busingye bw'ekansa obwabaire nibuza kwija. Omu mushororongo gwa 3 nikyetwa eky'obunabi kandi ekyo buzima nikwo kiri.

Ekitabo eki burijjo kikira kwetwa Okushuuruurwa kwa Yohaana Orikwera, kwonka ekyo tikihihire. N'Okushuuruurwa kwa Yesu Kristo okwahairwe Yohaana ahabw'Abakristaayo b'obusingye bwona. Nikyo kitabo kyonka omuri Baiburi yona eki Yesu Wenka yaayehandiikiire, We wenka naarabira omu kweyoreka omuhandiiki.

N'ekitabo eky'aha muheru gwa Baiburi, beitu nikingamba okutandika kandi n'omuheru gw'obwire bw'Engiri.

Hati okushuuruurwa omu Rugriika ni “apocalypse” ekirikumanyisa “okushwekuura.” Okushwekuura oku nikushoboorwa gye omu ky'okureeberaho ky'omusharuzi w'ebishushani by'ebiti, amabaare n'ebindi naashwekuura omurimo gwe gw'ebishushani ebibaizirwe, naabyoreka abareebi. N'okwihaho ekishwekyeso, naashuuruura ekibaire kishwekire. Hati okushwekuura oku ti kushuuruurwa kw'Omuntu Kristo kwonka, kureka N'OKUSHUURUURWA KW'EMIRIMO YE Y'OMU MAISHO OMU BUSINGYE MUSHANJU BW'EKANISA OBWABAIRE NIBWIJA.

Obukuru bw'okushuuruurwa n'Omwoyo aha mwikiriza w'amazima tiburikubaasa kuhamisirizibwa ekirenga. Okushuuruurwa nikukuru munonga ahariwe obundi kukira iwe oku orikwetegereza. Hati tindikugamba aha Kitabo ky'Okushuuruurwa eki hamwe naiwe. Ningamba aha kushuuruurwa KWONA. Nikukuru munonga aha kanisa. Nimwijuka omuri Matayo 16 ahu Yesu yaabuurize abeege Be ekibuuzo eki ati,

“Beitu abantu nibagira ngu Nyowe Omwana w'Omuntu Ndi oha? Baamugira bati: Abamwe nibagira ngu, Ori Yohaana Omubatizi, abandi ngu, Ori Eliya, kandi abandi ngu, Ori Yereimia nari omwe ahari baanabi. Yaababuuza ati: Mbweni shi imwe, mugira ngu Mba oha? Simooni Petero yaagarukamu ati: Ori Kristo, Omwana wa Ruhanga ohuriire. Yesu yaamugarukamu ati: Oine omugisha, Simooni mwene Yona; ahabw'okuba omubiri n'eshagama tibyo byakushuuruurira ekyo, kureka Tata Ori omu iguru. Kandi ninkugambira nti: Ori Petero, Naanye ndyayombeka ekanisa Yangye aha rukiri oru, n'amarembo g'okuzimu tigarigibaasa.”

Abakatoriki aba Rooma bagira ngu ekanisa eyombekirwe ahari Petero. Hati omu mazima egyo n'enshoboorora y'obuntu. Ruhanga akaabaasize ata kwombeka ekanisa aha muntu otahamire owaayehakaine Mukama Yesu kandi akakyeena obwo ariyo naayehakana? Ruhanga tarikubaasa kwombeka ekanisa Ye aha muntu weena ozaariirwe omu kibi. Kandi rukaba rutari rukiri oruri aho orikushusha oti omwanya ogwo Ruhanga akaba agweriize. Kandi tikiri nk'oku Abapurotesitante bagira, ngu ekanisa eyombekirwe ahari Yesu. Kukaba kuri OKUSHUURUURIRWA. Kishome omu muringo ogu kihandiikirwemu: “Omubiri n'eshagama tibyo BYAKISHUURUURWA, KUREKA TATA NIWE YAAKISHUURUURWA, kandi AHA RUKIRI ORU (OKUSHUURUURIRWA) NIHO NDYOMBOKA EKANISA YANGYE.” Ekanisa eyombekirwe aha Kushuuruurwa, ahari “Oku nikwo Mukama Arikugira.”

Abeeli akamanya ata eky'okukora kugira ngu aheyo ekitambo ekihikire ahari Ruhanga? Ahabw'okwikiriza akatunga okushuuruurwa kw'eshagama. Kaini taratungire okushuuruurwa nk'okwo (n'obu araabe yaabaire aine ekiragiro) n'ahabw'ekyo tarabaasize kuhayo ekitambo ekihikire. Kukaba kuri okushuuruurwa kuruga ahari Ruhanga okwataireho omutaano kandi kukaha Abeeli amagara agatahwaho. Hati noobaasa kutwara eki omuriisa arikugamba, nari eki seminario erikwegyesa, kandi n'obu waakuyegyesibwa n'abagambi barungi, Ruhanga ku Araabe atakikushuuriire ngu Yesu ni Kristo, kandi ngu n'eshagama erikukushemeza, kandi ngu Ruhanga n'Omujuni waawe, toritunga amagara agatahwaho. N'okushuuruurwa kw'Omwoyo okurikukira.

Hati ngizire nti Ekitabo ky'Okushuuruurwa eki n'okushuuruurwa kwa Yesu kandi n'eki Arikukora omu makanisa ahabw'obusingye mushanju obwo. N'okushuuruurwa ahabw'okuba abeege, bo bonka, bakaba batarikumanya amazima aga agahandiikirwe. Enyimaho gakaba gatakabashuuriirwe. Nimwijuka ngu bakaija

ahari Yesu omu Kitabo ky'Ebyakozirwe baamubuuza bati, “Obu nibwo bunaku obu orikwenda kugaruriramu obugabe bwa Israeli?” Yaabagarukamu ati, “Ti kyanyu kumanya ebiro nari obunaku.” Abo bashaija bakaba nibakiteekateekyera omuri Yesu kugira obugabe omu nsi. Kwonka bukaba buri obugabe bw'omwoyo obu Yaabaire naaza kwombeka. Nangwa Akaba atarikubaasa kubagambira omwanya Gwe omuri obwo bugabe, ahakuba Ishe akaba Atakakimushuururiire. Kwonka bwanyima y'okufa Kwe n'okuzooka, kandi n'omuri obu bwire omu buheereza Bwe bw'okutonganirira, Naabaasa kworeka hanu omuri oku kweshuuruurira Yohaana Kwe eki ekitiinisa Kye kandi n'okubaho Kwe omu kanisa birikumanyisa kandi n'okukora.

Omuri oku kushuuruurirwa Naatugambira omuheru gwa sitaane oku guri. Naatugambira eki arikwija kukorera sitaane kandi n'okumunaga omu nyanja y'omuriro. Naashuuruura omuheru gw'ababi abakurata Sitaane. Kandi ekyo Sitaane akyanga.

Oreetegereize oku Sitaane ayanga ebitabo bibiri bya Baiburi okukira ebindi byona? Kurabira omu batendekirwe eby'ediini abarikworobyamu hamwe n'abanyasayansa abateegyesibwe gye obutoosha Sitaane ataahirira Ekitabo ky'Okutandika n'Ekitabo ky'Okushuuruurwa. Omuri ebi bitabo bibiri nitushangamu obukomooko bwa Sitaane, emihanda ye mibi kandi n'okuhwerekyerera kwe. Ekyo nkyo kirikutuma yaabitaahirira. Naayanga okumushwekuura, kandi omu bitabo ebyo ashwekwirwe buzima kwo eki ari. Yesu akagamba ahari Sitaane ati; “Taine mugabo Omuriinye kandi Naanye tingwine omuriwe.” Sitaane akaayenzire kworeka ekyo okundi; kwonka tarikubaasa, n'ahabw'ekyo naakora kyona eki arikubaasa kuhwerekyereza obwesigye omu Kigambo. Kwonka ekanisa ku eyanga kwikiriza Sitaane kandi ekaikiriza okushuuruurirwa kw'Omwoyo omu Kigambo, amarembo g'okuzimu tigakaagisingura.

Reka ngire eki naagamba hanu ekirikuruga omu buheereza bwangye, ku muraabe mutarikufayo. Mwena nimumanya ngu ekiconco eki ekiri omu magara gangye kirengire eby'obuhangwa. N'ekiconco eki Omwoyo Orikwera arikukoresa kubaasa kucaaka endwara, hamwe n'ebiteekateeko by'omu mitima y'abantu, kandi n'ebintu ebindi ebisherekirwe ebi Ruhanga wenka arikubaasa kumanya reero Akabinshuuruurira. Nkaayenzire ngu mwemerere naanye haza mureebe ahamaisho g'abantu Sitaane yaamanya ku yaaza kushuuruurwa. Hati, ti bantu abu ndikugambaho. Ni ngu Sitaane aramatiire omu magara gaabo kurabira omu kibi, obutafayo, kandi n'endwara. Kwonka kuri nooreeba ahamaisho gaabo. Sitaane naamanya ngu yaaza kushuuruurwa, kandi empinduka ezikizireyo kuba ez'omutaano ziija ahamaisho g'abantu. Sitaane aine obwoba. Naamanya ngu Omwoyo wa Ruhanga ari haihi kumanyisa abantu emirimo ye. Nkyo kituma yaayanga enteerane ezi munonga. Amaziina ku gariwetwa kandi endwara zikashuuruurwa, Sitaane akyanga. Hati eki niki? Oku ti kushoma ebiteekateeko by'abantu, nari omugyereko ogurikwiha ekiteekateeko omu muntu gukakita omu ndiijo muntu, n'obu bwakuba oburogo. N'OKUSHUURURIRWA ahabw'Omwoyo Orikwera. Ogwo nigwo muhanda gw'onka ogu nkimanyiramu. N'ekya bumazima ebiteekateeko by'obuntu nibikyeta ekintu ekindi kyona kwonka tibikyeta Omwoyo Orikwera.

Ka nkwokeye enshonga endiijo erikutuma Sitaane yaayanga Ekitabo eki eky'Okushuuruurwa kwa Yesu Kristo omu kanisa. Naamanya ngu Yesu Kristo tahinduka oku abaire ari nyomwabazyo, n'eriizooba nikwo ari, kandi nikwo ariguma ebiro byona, kandi Tahinduka. Ekyo naakimanya kukirira hare obucweka makumi mwenda ahari igana bw'abanyadiini abatendekirwe. Naamanya ngu nk'oku Ruhanga Ari otahinduka omu mbeera Ye, nikwo Ari otahinduka n'omu mitwarize Ye. Omu buryo obwo Sitaane naamanyira kimwe ngu ekanisa eyaabandize ahari Pentekoote eine amaani ga Ruhanga (Mako 16 omu bikorwa) niyo Kanisa y'Amazima ei Yesu arikweta Eye. Ezindi zoonza n'ez'ebishuba. Nikiteekwa kuba kityo.

Hati ijuka eki. Kristo omu Kanisa ey'Amazima n'okugumizamu kw'Ekitabo ky'Ebyakozirwe. Kwonka Ekitabo ky'Okushuuruurwa nikyoreka nk'oku omwoyo gwa antikristo gwabaire niguza kwija omu kanisa gukagishiisha, gukagihindura kooyakooya, ey'emikoro kandi etaine maani. Nikishuuruura Sitaane, kirikushuuruura emirimo ye (kugyezaho kuhwerekyereza abantu ba Ruhanga kandi n'okwiha obwesigye omu Kigambo kya Ruhanga) okuhikira kimwe omu bwire obu arinagwa omu nyanja y'omuriro. Ekyo naakirwanisa. Tarikubaasa kukyemera. Naamanya ngu abantu ku baakutunga OKUSHUURURIRWA KW'AMAZIMA kw'EKANISA y'AMAZIMA n'eki eri, eki erikwikiriza kandi ngu NEEBAASA KUKORA EMIRIMO MIKURU, neiya kuba eihe eritarikubaasa kusingurwa. Ku baakutunga okushuuruurirwa kw'amazima kw'emwoyo ebiri erikukorera omu kanisa y'Enkristaayo, kandi ahabw'Omwoyo wa Ruhanga bakataanisa omu myoyo kandi bakazibira omwoyo gwa antikristo, Sitaane naija kuhwa amaani omu maisho gaayo. Ebiro ebi Sitaane naija kusingurwa buzima nk'obu Yesu yaayangira buri kugyezaho kwe kwona kw'okugira ngu Amutegekye omu ihamba. Eego, Sitaane ayanga okushuuruurirwa. Kwonka itwe nitukukunda. Twaba twine okushuuruurirwa kw'amazima omu magara gaitu, amarembo g'okuzimu tigarikubaasa kutusingura, kwonka itwe turyagasingura.

Noija kwijuka ku ngambire aha kutandika kw'obutumwa obu nti Ekitabo eki ekiturikwega n'Okushuuruurwa kwa Yesu buzima, We wenka, omu kanisa kandi n'omurimo Gwe omu busingye obw'omu maisho. Kandi ngambire nti nkyetaagisa Omwoyo Orikwera kutuha okushuuruurirwa kitari ekyo nitwija kuremwa kukutunga. Waabuganisa ebiteekateeko ebi bibiri noiya kureeba ngu tikirikwija kwetaagisa okwega kwa buriijo kwonka n'okuteekateeka kutuma Ekitabo eki kyaba ekihuriire. Nikiza kwetaagisa okukora kw'Omwoyo Orikwera. Ekyo nikimanyisa ngu Ekitabo eki tikirikubaasa kushuuruurirwa ondiijo weena kureka abantu b'omutaano. Nikiza kwetaagisa ogwo oine okwetegereza kwa nabi. Nikiza kwetaagisa okubaasa kuhurira kuruga ahari Ruhanga. Nikiza kwetaagisa okuhabura okurengire eby'obuhangwa, atari omwegi orikugyerageranisa omushororongo n'ogundi, n'obu ekyo kiraabe kiri kirungi. Kwonka enaama eyetenga okwegyesa kw'Omwoyo kitari ekyo

tekaashobooroka. Ka nitwetenga kuhurira kuruga ahari Ruhanga tutyo tukeeyanika omu maisho Ge reero tuteehayo aha Mwoyo kuhurira n'okumanya.

Nk'oku naaheza kugamba, Ekitabo eki (Okushuuruurwa) n'okumariirira kw'Ebyahandiikirwe. Kandi kitairwe n'omu mwanya oguhikire buzima omu Byahandiikirwe ebitarikubanganisibwaho; aha muheru. Hati noobaasa kumanya ahabw'enki kirikugamba ngu weena orikukishoma nari orikukihurira aine omugisha. N'okushuuruurwa kwa Ruhanga okurikwija kukuha obushoboorozi ahari sitaane. Kandi noobaasa kureeba ahabw'enki abo abaryongeraho nari bakacicwaho barikyeenwa. Nikiteekwa kuba kityo, ahakuba n'oha orikubaasa kwongyera nari kucwa aha kushuuruurwa okuhikire kwa Ruhanga haza akasingura omuzigu? Kyanguhi kityo. Tihariho kintu ekiine amaani agarikusingura nk'okushuuruurwa Ekigambo. Waareeba, omu mushororongo gwa kashatu omugisha guraganisiibwe abo abata omutima aha Kitabo eki bamaririire. Ninteekateeka ngu eki nikigamba aha mugyenzo gw'abanyamurwa omu Ndagaano eya Ira nibashomera abantu Ekigambo omu kasheeshe. Nooreeba, baingi bakaba batamanya kushoma, n'ahabw'ekyo omunyamurwa akaba abashomera. Obwire bwona obu kyabaire kiba kiri Ekigambo, omugisha gukaba gubaho. Ti nshonga yaaba kyabaire kishomwa nari kihurirwa.

“Obunaku buri haihi.” Obunaku bukaba butari haihi enyimaho. Omu bwengye n'omu kutegyeka kwa Ruhanga okushuuruurwa oku okukuru munonga (n'obu Ruhanga arikukumanyira kimwe) kukaba kutarikubaasa kwija obwire obwo. N'ahabw'ekyo ahonaaho nitwega engyenderwaho - okushuuruurwa kwa Ruhanga ahabwa buri busingye kwija omu busingye obwo bwonka, kandi omu bwire obutairweho. Reeba ebyafaayo bya Israeli. Okushuuruurwa kwa Ruhanga ahari Musa kukaija omu bwire bwonka obwabaire butairweho omu byafaayo, kandi nangwa namunonga kukaija abantu ku baatakiire Ruhanga. Yesu, We wenka, akaija omu bwire obuhikire, Ariwe Kushuuruurwa kwona kw'Obwaruhanga. Kandi omu busingye obu (obwa Laodikia) okushuuruurwa kwa Ruhanga kuryaija omu bunaku bwakwo. Tikuriremwa kwija n'obu kwakuba kwija obunaku butakahikire. Teekateeka ahari eki kandi okiteho omutima ohamize, ahakuba turi omu biro by'aha muheru.

OKURAMUTSYA

Okushuuruurwa 1:4-6

“Nyowe Yohaana naabandiikira imwe amakanisa mushanju ag'omuri Asia; Nimbendeza embabazi n'obusingye ebirikuruga ahari Ogwo Oriho, kandi Owaabaire Ariho, kandi Oribaho, kandi ebirikuruga aha Myoyo mushanju Eri omu maisho g'ekitebe Kye eky'obukama, kandi ebirikuruga ahari Yesu Kristo Kaareebi Omwesigwa, Omujigaijo omu Kuzooka, kandi Omutegyeki w'Abagabe b'Ensi. Ogwo otukunda, kandi Owaatukomorore omu bibi byaitu n'eshagama Ye, akatuhindura (abakama) n'abanyamurwa ahari Ruhanga We kandi Ishe, Aheebwe ekitiinisa n'obutegyeki ebiro byona. Amiina.”

Ekigambo, Asia, omu bwijwire ni Asia Enkye. N'ekicweka kikye ky'eitaka ekirikwingana n'obuhango bwa Indiana. Amakanisa mushanju agarikushangwa okwo gakatooranwa okwihwa omu gandi makanisa ahabw'emitwarize yaago, kandi emitwarize egyo niyo emwe eyaabaire neija kushangwa omu busingye obwabaire nibuza kukurataho omu myaka amagana eya bwanyima.

Emyoyo mushanju eri omu maisho g'ekitebe ky'obukama n'Omwoyo Owaabaire ari omu ntumwa mushanju, naaziha obuhereza bwazo omu busingye obu buri emwe yaabaire etwiremu.

Hati ebigambo ebi byona, “Ogwo Oriho,” na “Ogwo Owaabaire Ariho,” na “Ogwo Oribaho,” na “Kareebi Omwesigwa,” na “Omujigaijo kuruga omu Bafu,” na “Omutegyeki w'Abagabe b'Ensi,” na “Alufa na Omega,” na “Ow'obushoboorozi bwona,” n'ebitiinisa kandi okugamba aha MUNTU OMWE KANDI OMWE OGWO, Niwe Mukama Yesu Kristo, Owaatwogyizeho ebibi byaitu n'eshagama Ye.

Omwoyo wa Ruhanga omuri Yohaana naayoreka atyo okwenda ngu ayorekya Obukuru Oburikukirayo bw'Obwaruhanga obwa Yesu Kristo n'okushuuruura Obwaruhanga ku ni Ruhanga OMWE. Ebiro ebi hariho obuhabe bw'amaani. Buri ngu hariho Baruhanga bashatu omu mwanya gw'omwe. Okushuuruurwa oku oku Yesu, We wenka, yaahaire Yohaana, nikugorora obwo buhabe. Tikugira ngu hariho Baruhanga bashatu, kureka ni Ruhanga omwe omu ofiisi ishata. Hariho Ruhanga OMWE oine ebyeterero bishatu, Isheboona, Omwana, kandi n'Omwoyo Orikwera. Okushuuruurwa oku okukuru nikwo ekanisa y'okubanza yaabaire eine, kandi kushemereire kugarurwa busya omu biro ebi eby'aha muheru hamwe n'enkora ehikire ey'okubatiza omu maizi.

Hati abatendekirwe omu by'ediini ab'omurembe tibarikwikirizana naanye ahakuba hanu hariho ekyahandiikirwe omu katabo k'amahurire kakuru k'Ekikristaayo. “Egyo nyegyesa (ahari Tiriniiti) eri aha ntango y'omutima gw'Endagaano eya Ira. Nikwo eri n'aha ntango y'omutima gw'Endagaano Ensy. Endagaano Ensy n'Endagaano eya Ira byona nibihakanisa ekiteekateeko ekirikugira ngu hariho Baaruhanga abarikurenga ahari omwe. Kwonka Endagaano Ensy neeyegyesa bwerure ku Isheboona ari Ruhanga, n'Omwana ari Ruhanga, n'Omwoyo Orikwera ku ari Ruhanga, kandi ngu ebi bishatu TIBIRIKUGAMBA aha Muntu ogwo omwe, kureka n'abantu bashatu abakwataniise hamwe. Aho niho twiniire enyegyesa nkuru y'Abaperesona Bashatu kwonka ari Ruhanga omwe.”

Nibagaruka bagira ngu, “Okurugiirira omuri Baiburi, Ruhanga tari muperesona omwe wenka, kureka

n'abaperesona bashatu omuri Ruhanga omwe. Egyo niyo naama nkuru ya Tiriniiti.”

Buzima nikwo kiri. Abaperesona bashatu nibabaasa bata kuba omuri Ruhanga omwe? Oihireho okutaba na Baiburi erikukishagika, nikyoreka okubura obwengye bw'okuteekateeka. Abaperesona bashatu buri omwe okwe, n'obu baine ebirikubashushanisa, nibakora baaruhanga bashatu, kitari ekyo orurimi niruba rwaburira kimwe amakuru.

Garuka ohurikize ebigambo ebi, “Niinye Alufa na Omega, Ow'okubanza kandi Ow'aha muheru, nikwo Mukama arikugira, Ogwo Oriho, Ogwo Owaabaire Ariho, kandi Ogwo Oribaho, Ow'obushoboorozi Bwona.” Obu n'Obwaruhanga. Ogu tari nabi kwonka, omuntu. Ogu ni Ruhanga. Oku ti kushuuruurwa kwa Baaruhanga bashatu, kureka n'okwa Ruhanga OMWE, Ow'obushoboorozi bwona.”

Omu kutandika kw'ekanisa bakaba batarikwikiririza omuri Baaruhanga bashatu. Torikubaasa kushanga okwikiriza nk'okwo omu ntumwa. Enyegyesa egyo ekatahamu ahanyima y'obusingye bw'entumwa kandi buzima yaaba entsibuko y'okutaikirizana kandi enyegyesa nkuru omu Rukiiko rwa Niika. Enyegyesa y'Obwaruhanga ekareeta okwecwamu ebicweka bibiri ahari Niika. Kandi kuruga omu kwecwamu oku hakarugamu ebibiina bibiri ebyabaire bitarikubaasa kwikirizana. Ekibiina kimwe omu mazima kikaikiririza omuri baaruhanga baingi, baikiririza omuri Baaruhanga bashatu, abandi baikiririza omuri Ruhanga omwe. Hatariho kubanganisa eki kikaija kubaho bwanyima y'obwire bukwe, kwonka kikabaho, kandi tukiine n'eriizooba. Kwonka Okushuuruurwa ahabw'Omwoyo okurabira omuri Yohaana aha makanisa kukaba kuri ngu, “Niinye Mukama Yesu Kristo, kandi Niinye BYONA. Tihariho Ruhanga ondiijo.” Kandi akata akamanyiso Ke aha Kushuuruurwa oku.

Teekateeka ahari eki: Ishe wa Yesu akaba ari oha? Matayo 1:18 naagira ngu, “Yaareebwa aine enda y'Omwoyo Orikwera.” Kwonka Yesu, We wenka, akagira ngu Ruhanga niwe Ishe. Ruhanga Isheboona na Ruhanga Omwoyo Orikwera, nk'oku turikukoresa ebigambo ebi, nibikora Isheboona n'Omwoyo kuba OMWE. Kandi buzima nikwo bari, kitari kityo Yesu akaba aine ba Ishe babiri. Kwonka yetegereze ku Yesu yaagizire ngu We na Ishe bakaba bari OMWE - batari babiri. Ekyo nikikora Ruhanga OMWE.

Obu eki omu byafaayo kandi n'omu Byahandiikirwe kiri amazima, abantu nibeebuza ahu abashatu baarugire. Ekaba omusingye gw'enyegyesa omu Rukiiko rwa Niika omu mwaka gwa 325 A.D. Tiriniiti egi (ekigambo ekitarikwikirizana n'ebyahandiikirwe) ekaba eyegamiire baaruhanga baingi ba Rooma. Abarooma bakaba baine baaruhanga baingi abu baabaire bashaba. Bakaba bashaba baishenkurubo nk'abatonganirizi. Ekaba eri entambo y'okuheereza amaziina masya ahari baaruhanga aba ira, n'ahabw'ekyo twine abarikwera kugira ngu kireebekye kiri nk'ekya Baiburi. Mpaho, omu mwanya gwa baaruhanga b'Abarooma nka Jupiter, Venice, Mars, n'abandi twine Paulo, Petero, Fatima, Kristoofa n'abandi. Ediiini yaabo y'obupagaani ekaba etarikubaasa kukora na Ruhanga omwe wenka, n'ahabw'ekyo Ruhanga bakamucwamu bashatu, batyo baakora abarikwera abatonganirizi nk'oku baabaire baakozire baishenkurubo abatonganirizi.

Okuruga obwo abantu bakaremwa kwetegereze ku hariho Ruhanga omwe wenka oine ofiisi ishata nari shi okweyoreka kw'emiringo eshatu. Nibamanya ku hariho Ruhanga omwe kurugiirira omu Byahandiikirwe, kwonka nibagezaho kukikoramu ekiteekateeko kikuru ngu Ruhanga ni nk'omutsitsa gw'omuzaabibu; abaperesona bashatu barikubagana Obwaruhanga bumwe oburikwingana. Kwonka hanu omu Kushuuruurwa nikigamba butunu ku Yesu ari “Ogwo Oriho,” “Ogwo Owaabaire Ariho,” kandi “Ogwo Oribaho.” Niwe “Alufa na Omega,” ekirikumanyisa ngu Niwe, “A kuhika ahari Z” nari shi BYONA OMURI BYONA. Niwe byona - Ow'obushoboorozi bwona. Niwe Kimuri kya Rooza ekya Shaaroni, Irebe ry'omu ruhanga, Enyonyoozi y'omu kasheeshe Erikumurinkana, Eitaagi Erihikiire, Isheboona, Omwana, kandi n'Omwoyo Orikwera. Ni Ruhanga, Ruhanga Ow'obushoboorozi bwona. RUHANGA OMWE.

Timoseo 3:16 neegira ngu,

“Kandi tihariho kubanganisa, enaama (y'Obwaruhanga ni) nkuru buzima, erikugira eti: (Ruhanga) akoorekwa aine omubiri, yaahamibwa Omwoyo, yaareebwa baamaraiika, yaabuurirwa omu mahanga, yaikirizibwa ab'omu nsi, yaatwarwa omu iguru kutaaha omu kitiinisa.”

Eki nikyo Baiburi erikugamba. Hanu tihaine eki erikugamba aha muperesona ow'okubanza nari owa kabiri nari owa kashatu. Neegamba ngu Ruhanga akeyoreka omu mubiri. Ruhanga Omwe. RUHANGA OMWE ogwo akeyoreka omu mubiri. Ekyo kishemereire kumara. Ruhanga akaija omu muringo gw'omuntu. Ekyo tikiramukozire RUHANGA ONDIIJO. AKABA ARI RUHANGA, RUHANGA OGWO OMWE. Kukaba kuri okushuuruurwa buriya, kandi n'okushuuruurwa na hati. Ruhanga Omwe.

Ka tugarukye enyima omuri Baiburi tureebe oku Yaabaire ari omu kutandika kurugiirira aha kushuuruurwa oku Yaahaire We wenka. Yehova omukuru akeyorekyera Israeli omu nyomyo y'omuriro. Nka Maraika w'Endagaano Akatuura omu nyomyo y'omuriro kandi yaayebembera Israeli buriizooba. Ahari hekalu Akarangirira okwija Kwe n'ekicu kihango. Reero eizooba rimwe Akeyorekyera omu mubiri ogwazairwe oshugaine ogwabaire Gumutebeekaniisiibwe. Ruhanga owaabaire atuura ahaiguru y'amahema g'Abaisraeli Akeetaho eihema ry'omubiri yaatuura nk'omuntu omu bantu. Kwonka akaba ari RUHANGA OGWO OMWE.

Baiburi neeyegyesa ngu RUHANGA AKABA ARI OMURI KRISTO. OMUBIRI gukaba guri Yesu. Omuriwe Obwaruhanga bwona nimwo bwabaire buri, OMU MUBIRI. Tihaine ekirikubaasa kwetegyerezibwa okurenga aho. N'enaama, eego. Kwonka amazima gonyini - tikirikubaasa kwetegyerezibwa kukira aho. Mbweni ku Araabe yaabaire atari bantu bashatu obwo, na hati Taabaasa kuba bashatu. RUHANGA OMWE: Kandi Ruhanga ogwo omwe akaba omuntu.

Yesu akagira ati, “Nkaruga ahari Ruhanga kandi Ningyenda ahari Ruhanga.” Yohaana 16:27-28. Buzima ekyo nikyo kyabaireho. Akaruga omu nsi omu muringo gw'okufa Kwe, okuziikwa, okuzooka, n'okutemba omu iguru. Bwanyima Paulo Yaamubugana omu muhanda ogurikuza Damasiko kandi Yaagambira Paulo naagira ati, “Saulo, Saulo, Ompiigira ki?” Paulo yaagarukamu ati, “Ori Oha, Mukama wangye?” Yaamugarukamu ati, “Ndi Yesu.” Akaba ari enyomyo y'omuriro, omushana ogurikumya. Akaba yaahindikire, buzima nk'oku Yaagambire ngu Naija kuba. Kugaruka omu nshusha egyo ei Yaabaire arimu Atakajwaire orusiisira rw'omubiri. Okwo nikwo buzima Yohaana yaakireebire. Yohaana 1:18, “Okuruga iranaira tihariho orareebire Ruhanga; Omwana We omwe nyamunegyere, ori omu kifuba kya Ishe, niwe Yaamumanyiise.” Yetegyereze ahu Yohaana arikugira ngu Yesu ARI. Ari OMU kifuba kya Ishe.

Luka 2:11 nihagira hati,

“Ahabw'okuba eki kiro Omujuni yaabazaarirwa omu rurembo rwa Daudi, niwe Kristo Mukama waitu.”

Akazaarwa ari Kristo, kandi ahanyima y'ebiro munaana obu Yaasharwa Akeetwa Yesu, nk'oku maraika yaabagambiire. Nkazaarwa omu kika kya Branham. Obu naazaarwa bakaanyeta iziina William. Akaba ari KRISTO kwonka Akaheebwa iziina ahansi hanu omu bantu. Orusiisira orwo orw'aheeru oru abantu baabaire nibareeba rukaba nirwetwa Yesu. Akaba ari Mukama w'Ekitiinisira, Ow'obushoboorozi bwona owaayeyorekyeire omu mubiri. Ni Ruhanga Isheboona, Omwana, kandi Omwoyo Orikwera. Niwe ebyo byona.

Isheboona, Omwana, n'Omwoyo Orikwera n'ebyeterero kwonka. Tigari maziina. Nikyo turikubaturiza omu Iziina rya Mukama Yesu Kristo, ahakuba eryo n'eiziina, ti kyeterero. N'eiziina ry'ebyo byeterero, nk'oku waakukwata omwana w'omwereere w'omwojo okamweta iziina. Omwereere nikyo ari, omwojo n'ekyeterero, reero omwete eiziina, Yohaana Henry Brown. Torikufa kubatiza omu “Iziina rya Yesu.” Hariho ba Yesu enkumi n'enkumi omu nsi kandi na Yesu Omujuni waitu atakabaireho, bakaba bariho. Kwonka hariho omwe wenka omuribo owaazairwe ari Kristo, “Mukama Yesu Kristo.”

Abantu nibagamba ahari Yesu nk'Omwana wa Ruhanga Otahwaho. Mbweni oku t'okwehakanisa? N'oha oraahuriire ngu “Omwana” n'otahwaho? Abaana baine obutandikiro, kwonka ekyo ekitahwaho tikikagirahoga butandikiro. Ni Ruhanga Otahwaho (Yehova) oyorekirwe omu mubiri.

Omu Ngiri ya Yohaana Orikwera nihagira ngu,

“Bwa mbere na mbere hakaba hariho Kigambo; Kigambo ogwo akaba atuura na Ruhanga; kandi Kigambo akaba ari Ruhanga. Kigambo ogwo yaaba omuntu, yaatuura naitwe.”

Akaba ari Kareebi Omwesigwa kandi Ow'amazima aha Kigambo kya Ishe ekitahwaho. Akaba ari Nabi kandi Akaba agamba ebi Ishe yaabaire Amuragiira kugamba. Akagira ati, “Taata ari Omuriinye.” Ekyo nikyo Yesu orusiisira yaagambire, “Taata ari Omuriinye.”

Ruhanga aine ebyeterero bingi: “Okuhikiirira kwaitu,” kandi “Obusingye Bwaitu,” kandi “Oriho Obwire Bwona,” kandi “Tataitwe,” kandi “Omwana,” kandi “Omwoyo Orikwera”; kwonka Aine eiziina rimwe ryonka ery'obuntu kandi eiziina eryo ni Yesu.

Otakaaburabuzibwa Ahabwe kugira ofiisi ishata, nari shi ahabw'okuba Aine okweyoreka kw'emiringo eshatu. Omu nsi Akaba ari Nabi; omu iguru N'Omumyurwa; ku arigaruka omu nsi, Naija kuba ari Omugabe w'Abagabe. “Ogwo Owabaire Ariho” - Ogwo ni Yesu, Nabi. “Ogwo Oriho” - Niwe Ogwo, Omumyurwa Omukuru, Orikututonganirira - Ogwo Orikwera kusaasa naitwe omu bweremwa bwaitu. “Ogwo Orikwija” - Ogwo n'Omugabe orikwija. Omu nsi Akaba ari Kigambo - Nabi. Musa Akamugambaho ati, “Mukama Ruhanga waanyu aryabaimukiza Nabi nkaanye, kandi weena oryanga kuhurira ebigambo bya Nabi ogwo aryacuubwa omu bantu.”

Yetegyereze ebirikukwata ahari Yesu ebi. Omu nsi Akaba ari Nabi, Omwana gw'Entaama, kandi Omwana. Eki Tikiramuhindwire bashatu. Ebi bikaba biri emiringo ei yaayeyorekyeiremu nari shi za ofiisi z'Omuperesona Omwe, Yesu.

Hati hariho ekicwika ky'Ebyahandiikirwe eki abarikwiriza enyegyesa ya tiriniiti bakunda munonga nibateekateeka ngu nikihama enyegyesa yaabo erikugira ngu omu mazima hariho Abaperesona baingi omu Bwaruhanga.

Ekyahandiikirwe eki kiri omu Okushuuruurwa 5:6-8,

“Kandi ahagati y'ekitebe ky'obukama n'ebihangirwe ebyo ebiine amagara ebina n'abo bakuru, naareebaho Omwana gw'entaama ayemereire, Naashusha owaitsirwe, aine amahembe mushanju

n'amaisho mushanju, niyo Myoyo mushanju ya Ruhanga etumwa omu nsi zoon. Yaija, yaiha ekitabo omu mukono gwa buryo gw'Ogwo Oshutami aha kitebe ky'obukama. Ku Yaatawaire ekitabo, ebhangirwe ebyo ebina n'abakuru abo makumi abiri na bana baagwa ahansi, baajumara omu maisho g'Omwana gw'Entaama, buri omwe aine enanga n'orwabya rw'ezabu orwijwire obubaane bw'omugaju, nibyo by'okushaba by'abarikwera."

Kandi kwo emishororongo egi, ku orikugita yonka, neeshusha nk'erikuhama enyegyesa yaabo. Yetegereze, naagamba nti, egi mishororongo ku ORIKUGITA YONKA.

Kwonka, shoma Okushuuruurwa 4:2-3 na 9-11,

"Ahonaaho naashanga ndi omu Mwoyo, naareeba ekitebe ky'obukama kitairwe omu iguru, naareeba n'OWAABAIRE Akishutamiho. Kandi Ogwo Owaabaire ashutami akaba naashusha nk'eibaare rya yasipi n'erya sarudi, kandi ekyo kitebe ky'obukama kikaba kyehinguririziibwe omuhanganzima, ogwabaire nigushusha simaragido. Ebhangirwe ebyo ebiine amagara bikiha ekitiinisa Oshutami aha kitebe ky'obukama, kandi Oriho ebiro n'ebiro, byamuhimbisa, kandi byamusiiima, abakuru abo makumi abiri na bana bagwa ahansi, bajuumara omu maisho g'Ogwo Oriho ebiro n'ebiro, kandi banaga ahansi ebirunga byabo omu maisho g'ekitebe ky'obukama, nibagira bati: Mukama Ruhanga waitu, oshemereire kuhimbisibwa n'okuheebwa ekitiinisa n'obushoboorozi, ahaw'okuba Niwe waahangire byona; ahaw'okukunda Kwawe bikahangwa kandi byabaho."

Yetegereze kurungi ku omu mushororongo gwa kabiri harikugira hati, "OMWE" (Ti babiri nari bashatu kureka OMWE) akaba ashutami aha kitebe ky'obukama. Omu mushororongo gwa kashatu nihagira hati, "OGWO" (TI abo) akaba naashusha nka ibaare rya yasipi. Omu mushororongo gwa mwenda nihagira ngu ebhangirwe ebiine amagara bikaha ekitiinisa "OGWO" (ti abo). Omu mushororongo gwa ikumi nihagira ngu abakuru baagwa omu maisho "g'OGWO" (ti abo). Omu mushororongo gwa ikumi na gumwe nihagira hati, "MUKAMA Ruhanga waitu, oshemereire" (ti Abakama). Kandi omu mushororongo nigwo gumwe ogwa ikumi na gumwe nihagira ngu OGWO oshutami aha kitebe ky'obukama akaba ari "Omuhangi," Niwe Yesu (Yohaana 1:3), Niwe Yehova - Omwoyo - Ruhanga ow'Endagaano eya Ira (Okutandika 1:1).

Kwonka reka turekye kugarukira aho. Shoma hati Okushuuruurwa 3:21,

"Orikusingura, Ndyamwikiriza kushutama aha kitebe Kyangye eky'obukama, Nkaanye oku naasingwire, nkashutama hamwe na Tata aha kitebe ky'obukama Bwe."

Garuka oshome Abaheburaayo 12:2,

"Amaisho tugahangire Yesu wenka, Owaatandikire okwikiriza kwaitu kandi Omuhikiiriza waakwo; Owaayemeire omusharaba ahaw'okushemererwa kwatairweho omu maisho Ge, akagaya enshoni zaagwo, kandi hati ashutami aha rubaju rwa buryo rw'ekitebe ky'obukama bwa Ruhanga."

Yetegereze ngu kurugiirira ahari Yesu, We wenka, Owaahandiikire Okushuuruurwa, Ashutami HAMWE na Ishe. Omwoyo ori omuri Paulo (Omwoyo Ogwo n'Omwoyo wa Kristo, ahakuba Ogwo n'Omwoyo gw'Obunabi omu Ekigambo kiizira) naagira ngu Ashutami aha MUKONO GWA BURYO gwa Ruhanga. Kwonka Yohaana ku yaimukize amaisho akareeba "OMWE" aha kitebe ky'obukama. Tikirabaireho okuhitsya obu Okushuuruurwa 5:6-8 (erikukurata Okushuuruurwa 4:2-3 omu kukuratana kw'obwire) obu turikureeba "Omwana gw'Entaama" naiha ekitabo ahari "OGWO" Owaabaire ashutami aha kitebe eky'obukama, nk'oku kyorekirwe omu Okushuuruurwa 4:2-3 hamwe na 9-10. Eki n'enki? N'enaama ya "RUHANGA OMWE." We (Yesu), akaruga ahari Ruhanga, yaayeyekyera omu mubiri, yaafa kandi yaagaruka yaazooka, atyo yaagaruka "Omu Kifuba ky'Ishe." Nk'oku Yohaana yaagambire ngu, "Omwana We omwe nyamunegyere, Ori omu kifuba ky'Ishe, Niwe yaamumanyiise." Yohaana 1:18. Obu bukaba buri obwire bwa Ruhanga (Mesia) kugaruka kwakiira omugore We reero bwanyima Akeemurikira (Akeemanyisa) Israeli. Mbwenu nitugaruka tureeba Ruhanga naarugayo kugira ngu agire obuzaare bw'omubiri n'omuntu "nk'Omwana wa Daudi, Omugabe w'abagabe kandi Omukama w'abakama, kandi Kishwera w'Omugore w'Omumyama." TI Baaruhanga "Babiri," kureka RUHANGA OMWE naayoreka ofiisi Ze nkuru ishata n'ebiyetero Bye.

Abantu bakaba nibamanya ku Yaabaire ari Nabi. Bakaba nibamanya akamanyiso ka Mesia akaabaire nikaija kurabira omuri nabi wenka.

Yohaana 1:44-51,

"Kandi Filipino ogwo akaba ari owa Besesaida, tauni y'ow'aba Anderea na Petero. Filipino yaasherura Nasanaeli, yaamugira ati: Tureebire Ou Musa yaahandiikireho omu Biragiho, kandi akahandiikwaho na baanabi, Yesu owa Nazareesi, omwana wa Yosefu. Nasanaeli yaamubuza ati: Noogira ngu omuri Nazareesi nihabaasa kurugamu ekintu kirungi? Filipino yaamugira ati: Ija, oreebe. Yesu ku yaareebire Nasanaeli naija ah'Ari, Yaamugambaho ati: Reeba Omwisraeli kashushu, otaine buryarya! Nasanaeli Yaamugira ati: Waamanyisibwa ki? Yesu yaamugarukamu

ati: Filipo atakakwetsire, obu waaba ori ahansi y'omutiini, Naakureeba. Nasanaeli yaamugira ati: Rabi, ori Omwana wa Ruhanga! Ori Omugabe wa Israeli! Yesu yaamugarukamu ati: Ahabw'okukugambira nti, Naakureeba ahansi y'omutiini, nikiyo waikiririza? Oryareeba ebikuru ebirikukira ebyo. Yesu yaagaruka yaamugira ati: Buzimazima Ninkugambira nti: Muryareeba eiguru rikinguukire, baamaraika ba Ruhanga nibatembera kandi nibashuuma aha Mwana w'omuntu."

Okubaasa kumanya emitima - ebiteekateeko by'abantu kikareetera entoore za Ruhanga kwetegyereza ku hanu haabaire hariho Mesia, Ekigambo kya Ruhanga ekishukirweho amajuta.

Abaheburaayo 4:12,

"Ahakuba Ekigambo kya Ruhanga kiine amagara n'amaani, kiine obwogi bwingi okukira rurara yoona ey'amoogi abiri, nikiyemita kihika ahu kitaanisiza amagara n'omwoyo, engingo n'omushokooro, kandi kirahuka kucaaka ebi omuntu arikuteekateeka n'ebi amaririire omu mutima gwe kukora."

Ogwo mukazi aha iziba ku Yaamuhuriire naagamba ebiteekateeko ebyabaire biri omu mutima gwe, Yaamweta nabi, naarangirira ngu Mesia akaba naija kumanyirwa ahari okwo kubaasa okukuru.

Yohaana 4:7-26

"Haija Omusamariakazi kutaha amaizi; Yesu yaamushaba ati: Mpa eky'okunywa. Ahakuba abeezi Be bakaba bagiire omuri tauni kugura eby'okurya. Omusamariakazi yaamubuuza ati: K'ori Omuyudaaya, kandi nyowe Omusamariakazi, noobaasa ota kunshaba eky'okunywa? (Ahakuba Abayudaaya bakaba batakwatanisa n'Abasamaria). Yesu yaamugarukamu ati: Kuri noomanya ekiconco kya Ruhanga, n'Ogu Orikukushaba ati, Mpa eky'okunywa, naiwe okaamushabire, Nawe akaakuhaire amaizi g'amagara. Omukazi yaamugira ati: Mukama wangye, toine ky'okutahisa, kandi n'eiziba ni riraingwa; mbwenu ago maizi g'amagara noogaiha hi? Iwe nookira tatenkuriitwe Yakobo, owaatuhairere eiziba eri, eri yaabaire anywaho n'abaana be, akeesheraho n'amasyo ge? Yesu yaamugarukamu ati: Omuntu weena orikunywa aha maizi aga, aryagaruka agire eiriho; kwonka weena orikunywa aha maizi agu Ndimuha, tarigira iriho ebiro byona; ahakuba amaizi agu Ndimuha garyahinduka enshuro y'amaizi, efumukye omuriwe, neereeta amagara agatahwaho. Omukazi yaamugira ati: Mukama wangye, mpa amaizi ago, ndekye kugira eiriho n'obu kwakuba okugaruka aha kutaha. Yesu yaamugira ati: Irooko oyete baro, ogarukye aha. Omukazi yaamugarukamu ati: Tiinyine mushaija. Yesu yaamugira ati: Waagamba gye okugira ngu, toine mushaija; ahabw'okuba okashwerwa abashaija bataano; n'ogwo ou oine hati ti baro; eki waagamba n'amazima. Omukazi yaamugira ati: Mukama wangye, naayetegyereza ku Ori nabi. Baatatenkuriitwe bakaba baramiza aha rushozi oru, kwonka imwe nimugira ngu Yersaalemu niyo abantu bashemereire kuramiza. Yesu yaamugira ati: Mukazi 'we, Nyikiriza, obunaku nibwija kuhika, obu mutariramizamu Isheboona aha rushozi oru, n'obu haakuba omuri Yersaalemu. Imwe muramya eki mutarikumanya; itwe turamya eki turikumanya, ahakuba okujunwa kuruga omu Bayudaaya. Kwonka obunaku nibwija kandi bwahikire, obu abaramya ab'amazima bariramizamu Isheboona omu Mwoyo n'omu mazima; ahakuba Isheboona asherura abari nk'abo kumuramya. Ruhanga n'Omwoyo; kandi abamuramya bashemereire kumuramiza omu Mwoyo n'omu mazima. Omukazi yaamugira ati: Nimmanya ngu Mesia orikwetwa Kristo aryaija; ku ariija, aryatushobororera byona. Yesu yaamugira ati: Manya, Niinye orikugamba naiwe."

Omu Kushuuruurwa 15:3 nihagira hati,

"Nibeeshongora ekyeshongoro kya Musa omugaragwa wa Ruhanga, n'ekyeshongoro ky'OMWANA GW'ENTAAMA, nibagira bati: Mukama Ruhanga Ow'obushoborozi bwona, ebi Waakozire ni Bikuru kandi n'ebiy'okutangaza; emihanda Yaawe ehikiriire kandi n'ey'amazima, Nyakusinga Mukama (w'Abarikwera)."

Nookireeba? OMWANA GW'ENTAAMA, Omunyamurwa Omukuru okwaitse eshagama Ye nk'eky'okuriihirira aha kitebe ky'embabazi ahabw'ebibi byaitu niwe Mukama Ruhanga Ow'obushoborozi bwona. Ego niyo offiisi Ye obwa hati. Ekyo nikiyo Ariyo naakora hati, Naatutonganirira n'eshagama Ye ahabw'ebibi byaitu. Kwonka eizooba rimwe ogwo Mwana gw'Entaama aryaba Entare ey'Oruganda rwa Yuda. Aryaizira omu maani n'omu kitiinisa reero atware obushoborozi Bwe kutegyeka nk'Omugabe. N'Omugabe orikwija ow'ensi egi. Kwonka ekyo tikirikumanyisa ngu hati tari Mugabe. Ahakuba n'Omugabe waitu, Omugabe w'Abarikwera. Amagingo aga n'obugabe bw'omwoyo. Tiburi bw'enkorera y'ensi egi nk'oku naitwe tutari b'ensi egi. Niyo nshonga erikutuma twatwaza okundi okutari nk'okw'ensi. Obutuuzwe bwaitu buri omu iguru. Nitworeka Omwoyo w'ensi yaitu ey'okuzaarwa obwa kabiri ei Yesu ari Omugabe. Nikiyo abakazi baitu batajwarira bijwaro by'abashaija nari kushara amashokye gaabo nari kukoresa eby'okwetona ebyo byona n'ebindi bintu ebi ensi erikukunda munonga. Nikiyo kirikutuma abashaija baitu batanywa maarwa nari kureetsa nari kwejwanzya omu kibi. Obutegeyeki bwaitu n'obw'okutegeyeka ekibi kandi nibukoresa obushoborozi kurabira omu maani agari omu Mwoyo wa Kristo otuura

omuriitwe. Obugabe bwona obw'omu nsi nibuza kusheenywa, kwonka obwaitu nibwija kugumaho.

Hati tubaire nitugamba ahari za ofiisi kandi n'okweyoreka kwa Ruhanga omwe ow'amazima kandi turikureeba ekitiinisa Kye omu kwegga Ebyahandiikirwe. Kwonka Ti w'okumanywa omu bwengye bw'obuntu. Naamanyirwa omu buryo bw'Omwoyo; ahabw'okushuuruurirwa kw'Omwoyo. Ogu Omwe Owaabaire naamanywa nka Yesu omu buryo bwo'omubiri akagaruka omu nyomyo y'omuriro. Kwonka Akaraganisa ngu Aryagaruka atuure omu bantu Be omu Mwoyo. Kandi aha izooba rya Pentekoote egyo nyomyo y'omuriro ekashuuma yaayebaganisamu omu ndimi z'omuriro zaaza ahari buri omwe omuribo. Ruhanga akaba naakora ki? Akaba Naayebaganisiza omu kanisa, naagabira abo bashaija n'abakazi boona ekicweka Kye. Akeebaganisiza omu kanisa Ye nk'oku Yaabaire agambire ngu Aryakora.

Yohaana 14:16-23,

“Naanye ndyashaba Tata, Nawe aryabaha Omuhwezi ondiiyo, agume naimwe obutwire bwona. Omuhwezi ogwo n'Omwoyo w'Amazima, Ou ensi etarikubaasa kwakiira, ahakuba Temureeba n'obu kwakuba Okumumanya; kwonka imwe Mumumanya; ahakuba Aguma naimwe, kandi Aryatuura omuriimwe. Tindibatsiga muri efuuzi; Ndyaija ahi muri. Hatsigaire omwanya mukye, ensi Okutandeeba bundi; kwonka imwe Muryandeeba; ahabw'okuba Ndi ohuriire, naimwe muryaba abahuriire. Aha kiro ekyo muryamanya ku Ndi omuri Tata, naimwe ku muri Omuriinye, Naanye omuriimwe. Oine ebiragiyo Byangye akabyorobera niwe Arikunkunda; kandi orikunkunda, aryakundwa Tata, Naanye ndyamukunda, Mweyorekye. Yuda, otari Iskaryota, Yaamubuuzi ati: Mukama wangye, kibaire kita iwe okutweyoreka, oteeyorekye nsi? Yesu yaamugarukamu ati: Omuntu ku Arikunkunda aryarinda Ekigambo Kyangye, na Tata aryamukunda kandi Turyaija ahariwe, tutuure nawe.”

Akagira ngu Akaba naija kushaba Ishe Owaabaire naija kwohereza Omuhwezi ondiiyo Owaabaire ashangirwe ARI HAMWE nabo (abo beegi) kwonka ATARI OMURIBO. Ogwo akaba ari Kristo. Reero omu mushororongo gwa 23, Arikwegambaho na Ishe, akagira ngu TURYAIJA. Nkikyo aho: “Omwoyo naija, Omwoyo Niwe omwe wa Ruhanga owaayeyorekire nka Isheboona, kandi nk'Omwana, aryagaruka ayeyorekyere omuri baingi” - RUHANGA OMWE Ori Omwoyo.

Nikyo hatarikubaasiza kwija omuntu weena akagira ngu omuntu orikwera ni paapa nari ngu omuntu orikwera ni bishopu nari omusaserdooti. OMUNTU ORIKWERA ni Kristo, Omwoyo Orikwera, omuriitwe. Abakuru b'ediini nibatiinuuka bata kugira ngu abakuratsi tibaine kigambo ky'okugamba? Buri omwe aine eki yaakugamba. Buri omwe aine omurimo, buri omwe aine obuheereza. Omwoyo Orikwera akaija ahari Pentekoote kandi Yaayebaganisiza ahari buri omwe, kugira ngu kibone kuhikiirira eki Kristo yaagambire ati,

“Aha kiro ekyo muryamanya ku Ndi omuri Tata, naimwe ku muri Omuriinye, Naanye omuriimwe.”

Yohaana 14:20.

Ogwo Mbaho Omukuru, Ruhanga Ow'obushoboorozi bwona, aizire nk'Omwoyo kwijuzi ekanisa Ye ey'amazima. Aine obugabe kuza ahantu hoona ahu Arikwenda, n'ahari weena Ou arikwenda. Tihaine bantu abu turikuhindura “abarikwera” omuriitwe, kwonka omutwe gw'abantu gwona ba Mukama ab'amazima n'ogurikwera, ahabw'okubaho kw'Omwoyo Orikwera. N'ogwo, Omwoyo Orikwera, niwe Arikwera, ti mutwe gw'abantu ahabwagwo.

Hati okwo nikwo kushuuruurirwa: Yesu Kristo ni Ruhanga. Yehova ow'Endagaano eya Ira ni Yesu ow'Endagaano Ensyu. N'obu waakugyezaho munonga ota, torikubaasa kuhamya ngu hariho Baaruhanga BASHATU. Kwonka nabwo nikyetaagisa Omwoyo Orikwera kukushuuruurira kugira ngu oyetegyereze amazima ku Ari Omwe. Nikitwara okushuuruurirwa kureeba ku Yehova ow'Endagaano eya Ira ni Yesu ow'Endagaano Ensyu. Sitaane akashenshera omu Kanisa yaita abantu amaisho aha mazima aga. Kandi ku baaherize kutareeba ago mazima, tikiratwaire bwire buraingwa Ekanisa ya Rooma yaarekyer'aho kubatiza omu Iziina rya Mukama Yesu Kristo.

Niinyikiriza ngu nikyetaagisa okushuuruurirwa okurikwo okurikuruga aha Mwoyo Orikwera kugira ngu orebe amazima g'Obwaruhanga omu biro ebi obu turi rwagati y'okukiikamya kubi Ebyahandiikirwe bingi. Kwonka ekanisa ensinguzi eyombekirwe aha kushuuruurirwa n'ahabw'ekyo nitubaasa kutegyereza Ruhanga kutushuuruurira amazima Ge. Kwonka, omu mazima torikwetenga okushuuruurirwa aha kubatizibwa omu maizi. Eki kikuri omu maisho nikikureeba. Kikaabaasikire edakiika n'emwe entumwa kuhabisibwa kuruga aha ki Mukama yaabaragiire butunu eky'okubatiza omu Iziina rya Isheboona n'ery'Omwana n'ery'Omwoyo Orikwera reero akabashanga omu bugomi bakigyendereire? Bakaba nibamanya Eiziina eryo, kandi tihariho omwanya na gumwe omu Byahandiikirwe ahu baabatiize omu muringo ogundi kwihaho omu Iziina rya Mukama Yesu Kristo. Obwengye bw'obutoosha bukaakworekire ku Ekitabo ky'Ebyakozirwe niyo kanisa omu bikorwa, kandi ku baraabe baabatiize omu muringo ogwo, n'ahabw'ekyo ogwo nigwo muringo ogw'okubaturizamu. Hati ku oraateekateekye ngu ekyo kigumire, eki kyo nookiteekateekaho ki? Omuntu weena owaabaire atabatizibwe omu Iziina rya Mukama Yesu akaba naateekwa kugaruka akabatizibwa.

Ebyakozirwe 19:1-6

“Apolo ku yaabaire akiri Korinso, Paulo yaaraba omu kyanga kya ruguru, yaahika Efeso, yaashangayo abeegi bamwe; yaababuza ati: Obu mwaikiriza, mukaheebwa Omwoyo Orikwera? Baamugarukamu bati: Ngaaha, n'okuhurira titukahuriraga, yaaba habaho Omwoyo Orikwera. Yaagira ati: Mukabatizibwa omu kubatizibwa ki? Bati: Omu kubatiza kwa Yohaana. Paulo yaagira ati: Yohaana akabatiza okubatiza kw'okweteisa, naagambira abantu kwikiriza Ogwo orikwenda kwija enyima ye, niwe Yesu. Ku baahuriire ekyo, baabatizibwa omu Iziina rya Mukama waitu Yesu. Paulo ku yaabataireho engaro, Omwoyo Orikwera yaabajaho; baagamba endimi ezindi, baaragura.”

Nkikyaho. Abo bantu barungi ba Efeso bakaba baahuriireho eby'okwija kwa Mesia. Yohaana akaba Yaamubuuriireho. Bakaba babatizibwe okubatizibwa kw'okweteisa ebibi, BATEGYEREIZE okwikiriza Yesu. Kwonka hati bukaba buri obwire BW'OKUGARUKA kureeba Yesu n'okubatizibwa ahabw'OKWIHWAHO ebibi. Bukaba buri obwire bw'okuheebwa Omwoyo Orikwera. Kandi ku baabatizibwe omu Iziina rya Mukama Yesu Kristo, Paulo yaabataho engaro Omwoyo Orikwera yaabajaho.

Oo, abaturage abo ba Efeso bakaba bari abantu barungi; kand ku haakubaireho abantu abaabaire baine obugabe bw'okuhurira bahamire, bakaba bari abo. Yetegereze ahu baabaire baahika. Bakaba baahika aha kwakiira Mesia owaabaire naija. Bakaba Bamweteekateekire. Kwonka torikureeba ngu n'obu kiraabe kyabaire kiri kityo bakaba Bamuteishukireho? Akaba Yaizire kandi yaagyenzire. Bakaba nibeetenga okwijuzibwa Omwoyo Orikwera.

Ku oraabe waabatizibwe omu Iziina rya Mukama Yesu Kristo, Ruhanga naija kukwijuzwa Omwoyo We. Ekyo n'Ekigambo.

Ebyakozirwe 19:6 ebi twashoma bikaba nibihikiiriza Ebyakozirwe 2:38,

“Mweteise, mwena mubatizibwe omu Iziina rya Yesu Kristo, mubone kusaasirwa ebibi byanyu; kandi nimwija kuheebwa ekiconco ky'Omwoyo Orikwera.”

Waareeba, Paulo, naayebemberwa Omwoyo Orikwera akagambira kimwe nk'ebi Petero yaagambisiibwe Omwoyo Orikwera. Kandi ebyagambirwe TIBIRIKUBAASA kuhindurwa. Nibiteekwa kushushana nk'oku byabaire biri kuruga aha izooba rya Pentekoote kuhitsya obu entoore ey'aha muheru eribatizibwa.

Abagalatia 1:8,

“Kwonka ku haakugira owaababuurira engiri etari nka i twababuuriire, yaaba itwe n'obu yaakuba maraika orugire omu iguru, akyeenwe.”

Hati bamwe omuriimwe aba Yesu Wenka nimubatiza okugwire. Nimubatiza ahabw'okugira ngu mugarurwe busya orikushusha oti okwibikwa omu maizi kukabajuna. Okugarurwa busya tikurikureetwa amaizi; n'omurimo gw'Omwoyo. Omuntu owaayebembeirwe Omwoyo Orikwera akaragiira ati, “Mweteise, mwena mubatizibwe omu Iziina rya Mukama Yesu,” taragambire ngu amaizi nigagarura busya. Akagira ngu n'ekirikuhama “omutima ogutarikweshinja ahari Ruhanga.” Kikaba kiri ekyo kyonka.

Petero 3:21,

“Amaizi ago niky kishushani ky'ago agabakiza omu kubatizibwa, ti kwihaho nziro z'omubiri, kureka n'endagaano y'omutima ogutarikweshinja ahari Ruhanga, kandi ebajuna ahabw'okuzooka kwa Yesu Kristo.”

Ekyo ninkikiriza.

Omuntu weena owaakuba aine enteekateeka egwire ngu ebyafaayo nibyoreka ngu okubatiza omu maizi kuri omu muringo ogundi gwona ogutari omu Iziina rya Mukama Yesu Kristo, ninkuhabura kushoma ebyafaayo nikwo iwe wenka oyesherurire. Ekirikukurataho ahaifo n'Okubatiza omu mazima okwabaireho omuri Rooma omu mwaka gwa A.D. 100 kandi kukagaruka kwahandiikwa omu katabo k'amahurire akarikwetwa TIME, ebiro 5 Okwaikumi-na-ebiri 1955. “Omudiikoni yaimutsya omukono gwe, kandi Publius Decius yaaraba omu muryango gw'eibatirizo. Marcus Vasca omutunzi w'embaaho akaba ayemereire omu kiyanja amaizi gamuhikire omu manyaanya. Akaba naamwenya obu Publius yaaribaata omu kiyanja aha rubaju rwe. 'Credis?' yaabuza. 'Credo,' Publius yaagarukamu. 'Niinyikiriza ngu okujunwa kwangye nikuruga ahari Yesu ori Kristo, Owaabambirwe omu biro bya Pontio Pilaato. Nkafa Nawe kugira ngu mpeebwe Amagara Agatahwaho hamwe Nawe.' Atyo yaahurira emikono y'amaani emubangiire, yaayeyorobyanya yaagwa omu kiyanja agarami, kandi yaahurira eiraka rya Marcus omu kutu kwe - 'Ninkubatiza omu Iziina rya Mukama Yesu' - obwo amaizi agarikufuka nigamushweka.”

Bakaba nibabatiza omu Iziina rya Mukama Yesu Kristo kuhitsya obu amazima gaabuzire (kandi tigaragarukire okuhitsya omu busingye obu obw'aha muheru - eki kikabaho okuruga ahari Niika okuhitsya aha kutandika kw'ekyasha kya makumi abiri eki). Kwonka amazima gagarukire. Sitaane tarikubaasa kuzibira okushuuruurwa Omwoyo yaaba naayenda kukuha.

Eego, ku haakubaire hariho Baaruhanga bashatu, obwo mukaabatiize ahabwa Isheboona, kandi n'Omwana, kandi n'Omwoyo Orikwera. Kwonka OKUSHUURUURIRWA OKWAHAIRWE YOHAANA kukaba kuri ngu hariho RUHANGA OMWE kandi Eiziina Rye ni MUKAMA YESU KRISTO, kandi nimubatiza ahabwa Ruhanga OMWE kandi omwe wenka. Ekyo nikyo kyareeteire Petero okubatiza omu muringo ogu yaabatiizemu ahari Pentekoote. Akaba naateekwa kuba ow'amazima aha kushuuruurirwa okwabaire nikugira kuti: "N'ahabw'ekyo ab'enju ya Israeli boona bamanye buzima ngu YESU OGWO, Ou mwabambire, Ruhanga akamuhindura OMUKAMA KANDI KRISTO." Ngunwo aho, "MUKAMA YESU KRISTO."

Yesu ku araabe ari "BYOMBI" Mukama kandi Kristo, n'ahabw'ekyo We (Yesu) ni, kandi tabaasa kuba ekindi kyona kureka "Isheboona, Omwana, kandi Omwoyo Orikwera" omu Muntu OMWE owaayeyorekyeire omu mubiri. TARI "Ruhanga omu baperesona bashatu, tiriniiti ehairwe omugisha," kureka RUHANGA OMWE, OMUPERESONA OMWE oine ebyeterero bishatu bikuru, oine ofiisi ishata ezirikworeka ebyo byeterero. Garuka okihurire. Yesu ogu niwe "BYOMBI Mukama kandi Kristo." Mukama (Isheboona) kandi Kristo (Omwoyo Orikwera) byona ni Yesu, ahakuba We (Yesu) ni BYOMBI (Mukama kandi Kristo).

Ekyo ku kiraabe kitatworekire okushuuruurirwa okw'amazima okw'Obwaruhanga, tihaine ekirikworeka. Mukama TARI ondijjo; Kristo TARI ondijjo. Yesu ogu niwe Mukama Yesu Kristo - RUHANGA OMWE.

Filipo eizooba rimwe akagambira Yesu ati, "Mukama wangye, tworekye Isheboona ekyo nikitumara." Yesu yaamubuuza ati: Ahi Naakatuurira naimwe, Tokaamanyaga? Ondeebire, biri areebire Isheboona, n'enki ekirikukushabisa oti, Otwarekye Isheboona? Nyowe na Tata tuba omwe."

Rimwe nkagamba ebigambo ebyo omukazi yangira ati, "Rindaho kakye, Omw. Branham, Iwe n'omukazi waawe muri omwe."

Naagira nti, "Ti muringo ogwo."

Yaagira ati, "Ngarukiramu?"

Ntyo naamugira nti, "Nondeeba?"

Yaagira ati, "Eego."

Naagira nti, "Nooreeba omukazi wangye?"

Yaagarukamu ati, "Ngaaha."

Naagira nti, "Obumwe obwo n'obw'omuringo ogundi, ahakuba Akagira ati, 'Ondeebire biri areebire Isheboona.'"

Nabi akagira ngu omu mwabazyo omushana guryajwa. Omu kyeshongoro kihandiikirwe ngu:

"Omu mwabazyo omushana guryajwa,
Akahanda akarikuza omu kitiinisa buzima muryakabona,
Omu muhanda gw'amaizi, ogwo nigwo mushana gwa hati,
Muziikirwe omu Iziina ery'omuhendo erya Yesu.
Abato n'abakuru, mweteise ebibi byanyu byona,
Omwoyo Orikwera buzima naija kutaahamu.
Omushana gw'omwabazyo gwizire -
N'amazima ngu Ruhanga na Kristo n'omwe."

Enshumi nkye ehingwire nkaba ningamba na Rabi w'Abayudaaya. Yangira ati, "Imwe Banyamahanga 'mwe timurikubaasa kutemamu Ruhanga ebicweka bishatu haza Mukamuha Omuyudaaya. Itwe nitumanya kukira aho."

Naamugira nti, "Nikwo kiri Rabi, titurikutemamu Ruhanga ebicweka bishatu. Noikiriza baanabi, tikwo?"

Yaagira ati, "Buzima nimbaikiriza."

"Noikiriza Isaaya 9:6?"

"Eego."

"Nabi akaba naagamba ahari oha?"

"Mesia."

Naamubuuza nti, "Mesia aryaba aine buzaare ki na Ruhanga?"

Yaagarukamu ati, "Aryaba ari Ruhanga."

Naagira nti, "Ago n'amazima." Amiina.

Torikubaasa kuta Ruhanga omu baperesona bashatu nari omu bicweka bishatu. Torikubaasa kugambira

Omuyudaaya ngu hariho Isheboona, n'Omwana n'Omwoyo Orikwera. Naija kukugambira ahonaaho ahi ekiteekateeko ekyo kyarugire. Abayudaaya nibamanya ku enyikiriza egi yaahamiibwe omu Rukiiko rwa Niika. Tikirikutangaza nibatushekyerera ngu turi abapagaani.

Nitugamba ahari Ruhanga otahinduka. Abayudaaya nabo ekyo nibakiikiriza. Kwonka ekanisa ekahindura Ruhanga waayo otahinduka kuruga ahari OMWE kuba BASHATU. Kwonka omushana guriyo nigugaruka omu bwire bw'omu mwabazyo. Reebe oku kiri eky'okutangaaza amazima aga oku gaizire omu bwire obu Abayudaaya bariyo nibagaruka omuri Palesitaini. Ruhanga na Kristo n'OMWE. Yesu ogu ni BYOMBI MUKAMA KANDI KRISTO.

Yohaana akaba aine okushuuruurwa, kandi YESU akaba ari okwo kushuuruurwa, kandi We akeyoreka hanu omu Byahandiikirwe - "NIINYE Owaabaire Ariho, Oriho, kandi Oribaho, Ow'obushoboorozi bwona. Aminiina."

Okushuuruurwa kwaba kukuri hare, imutsya amaisho okusherure ahari Ruhanga. Ogwo nigwo muhanda gwonka ogu waakukutungiramu. Okushuuruurwa nikuteekwa kuruga ahari Ruhanga. Tikukareetwaga muntu, okubaasa kw'obuhangwa, kureka kuheebwa Omwoyo. Noobaasa kukwata omu mutwe Ebyahandiikirwe, kandi n'obu ekyo kiraabe kiri kirungi, tikirikubaasa kukora. Nikuteekwa kuba okushuuruurwa okuruga ahari Ruhanga. Omu Kigambo nihagira ngu tihariho owaakubaasa kugira ngu Yesu ni Kristo atagambisiibwe Mwoyo Orikwera. Nootekwa kuheebwa Omwoyo Orikwera reero obwo, kandi obwo bwonka, nibwo Omwoyo arakuhe okushuuruurwa ku Yesu ari Kristo: Ruhanga, Oshukirweho Amajuta.

Tihariho orikumanya ebya Ruhanga kureka Omwoyo wa Ruhanga hamwe n'ogwo ou Omwoyo wa Ruhanga abishuuruurira. Tushemereire kutakira Ruhanga kutuha okushuuruurwa kukira ekindi kyona omu nsi. Twikiriize Baiburi, twayakiira amazima makuru gaayo, kwonka tekahindikire ehuriire aha bantu baingi ahabw'okuba okushuuruurwa kw'Omwoyo tikuriho. Ekigambo tikikahindikire ekihuriire. Omuri 2 Abakorinso 5:21 Baiburi neegira ngu tuhindikire okuhikiirira kwa Ruhanga ahabw'okuteerana na Yesu Kristo. Ekyo waakikyenga? Neegira eti: TURI OKUHIKIIRIRA KWONYINI KWA RUHANGA WE WENKA ahabw'okuba OMURI KRISTO. Neegira ngu We (Yesu) Akahinduka EKIBI ahabwaitu. Terikugira ngu Akahinduka omunyabibi, kureka Akahinduka EKIBI ahabwaitu kugira ngu ahabw'okuteerana kwaitu Nawe tubaase kuba OKUHIKIIRIRA kwa Ruhanga. Ku turaikirize eki ngu (kandi nituteekwa) Akahinduka EKIBI ahabwaitu ahabw'okuza omu mwanya gwaitu, obwo nituteekwa kwikiriza n'eki ngu itwe ahabw'okuteerana Nawe tuhindikire OKUHIKIIRIRA KWONYINI kwa Ruhanga. Okwanga kimwe biri nooba oyangire ekindi. Okwakiira kimwe nooba oyakiriire ekindi. Hati nitumanya ngu Baiburi neegamba etyo. Tikirikubaasa kuhakanisibwa. Kwonka okushuuruurwa kwakyo kubuzire. Tikikashoboorokyeire baingi aha baana ba Ruhanga. N'omushororongo murungi kusha omuri Baiburi. Kwonka tushemereire kugutunga guhindwirwe OGUHURIIRE ahariitwe. Ekyo nikyetaagisa okushuuruurwa.

Reka ngire ekintu eki naanagamu hanu ekiraakutangaaze kandi kikakuhwera. Kigumire kubona omwegi otarikwikiriza ku Endagaano Ensywa yaabandize kuhandiikwa omu rurimi rw'Orugriika. Abeegi baitu boona rurangaanwa aba Baiburi bakagira ngu Ruhanga akaha ensi amahanga makuru ashatu n'ebikorwa bikuru bishatu ahabw'Engiri. Akaha Abagriika abaareetsire orurimi orirukubuga hoono. Akatuheereza Abayudaaya abaatuhaire ediini ey'amazima kandi n'okumanya Ruhanga okw'amazima kurabira omu Mujuni. Akatuha Abarooma abaatuhaire obutegyeki obwa rwagati hamwe n'ebiragiro kandi n'enguuto rugyendwa. Mbweni twine ediini y'amazima, orurimi orw'okugyorekyeramu abantu baingi, na gavumenti n'enguuto by'okugibuzya hoono. Kandi okureebera omu byafaayo eki nikireebeka kuba kihikire. Kandi ebiro ebi abeegei baitu Abagriika nibagira ngu orurimi Orugriika orw'omu biro bya Baiburi ruhikiire kimwe kandi ruteereire kuhitsya obu omwegi w'Orugriika yaaba ashongokire kandi ari omwerinzi omu kumanya emihandiikire jaarwo, buzimazima naabaasa kumanyira kimwe eki Ekigambo ky'Endagaano Ensywa kirikwegyesa. Kwonka eki t'ekiteekateeko kwonka? Eki n'amazima? Kandi tikiri ngu buri mwegi weena rurangaanwa ow'Orugriika kuruga omu kigombe ky'ediini kimwe naahakanisa ondiijo mwegi w'omu kigombe ekindi, kandi tikiri ngu empaka zaabo zikomooka aha bigambo by'Orugriika ebirikushushana kandi barikutegyekwa ebiragiro ebirikushushana eby'okurushoboorora? Buzima nikwo kiri. Nangwa n'okwo enyima omu busingye bwa Perugamo, habuzireho kakye okuhika aha Rukiiko rwa Niika orw'omu mwaka ogwa 325 hakaba hariho abeegei babiri rurangaanwa, Arius na Athanasius abaagizire orugamba rw'empaka z'enyegyesa aha kigambo ky'Orugriika. Okuhakana kwabo kukaba okw'amaani kandi kwabuga ensi yoono kuhitsya obu abakugu b'byafaayo baagizire ngu ensi ekabaganisibwamu ahabw'emigambire y'ekigambo (enyatura y'enyuguta ibiri omu kigambo). Hati Orugriika ku ruraabe ruhikire kandi rwatairweho Ruhanga, ahabw'enki empaka ezo zaabaireho? Hoono buzima Ruhanga akakigyenderera ngu twena tumanye Orugriika? Reebe n'eriizooba hakiriho empaka aha Rugriika. Twara eky'okureeberaho ekitabo, "Christ's Paralyzed Church X-rayed" ekyahandiikirwe Dr. McCrossan. Omuri ekyo kitabo ahandiikiremu ebyagambirwe bingi abakugu rurangaanwa omu kumanya enkoresa y'orurimi Orugriika, kandi naakyoreka amazirwe wenka ngu ebiragiro by'enkoresa y'orurimi Orugriika ebitarikuhinduka nibihanya birikuhendera ku Baiburi erikwegyesa ngu omuntu naabatizibwa n'Omwoyo Orikwera atakazairwe obwa kabiri. Kandi naagaruka ashoboorora butunu ngu abakazi nibabaasa kutemba ekituuti ngu ahabw'okuba ekigambo kuhanuura nikimanyisa okubuurira. Kwonka shi abaasize kwikiririsa abandi beegi b'Orugriika abarikwetegyereza nkawe? Ngaaha. Eki oshemereire kukora kyonka n'okushoma eby'abo beegi abaine enteekateeka y'omutaano nikwo ohurire ebi barikugamba.

Tikugira ngu ebi naaheza kugamba n'amazima kwonka, kureka ka tuteere endiijo ntambo omu maisho. Ebiro ebi twine abeegei bamwe abarikugira ngu emizingo y'ebitabo eyaabandize ekaba ehandiikirwe omu rurimi rw'oru

Aramaic orwabaire ruri orurimi rwa Yesu n'ab'omu biro Bye. Abeegi aba nibakihanya ngu abantu b'omu bwire bwa Yesu bakaba batarikugamba nari kuhandiika omu Rugriika nk'oku baingi barikukiteekateeka. Kandi amazima gari ngu abakugu omu byafaayo beebaganiisemu ahari eki. Eky'okureeberaho, Dokita Schonfield, omwegi omukugu munonga kuruga omu kucondooza ayorekyeire kimwe kandi amazirwe ngu Endagaano Ensyia ekahandiikwa omu rurimi rw'enzaarwa orw'Orugriika orwabaire nirugambwa abantu b'omu biro ebyo. Naashoboorora ebi arikwikiriza kurungi, naabyegamiza aha bihandiiko bingi ebi aine. Kandi orubaju orundi twineho omwegi ondijjo rurangaanwa, Dokita Lamsa, orikwikiriza ngu Endagaano Ensyia ekahandiikwa omu rurimi rw'oru Aramaic kandi taine ondijjo ou arikwegamizaho okuhakana kwe kureka omukugu munonga omu byafaayo, Toynbee, orikuhanya ngu orurimi rw'oru Aramaic, RUTARI RUGRIIKA nirwo rwabaire ruri orurimi rw'abantu, n'ahabw'ekyo ngu nikibaasika Endagaano Ensyia kuba yaabandize kuhandiikwa omu rurimi rw'oru Aramaic.

Kwonka, tutakataireho omutima munonga ahari eki, reka tushome Baiburi ezi zombi, eya King James hamwe n'eyaahandiikirwe Dokita Lamsa. Ekirikutumara n'okushanga ngu ebigambo ebiri omuri ezi zombi nibishushanira kimwe omu muringo ogurikutangaaza. N'ahabw'ekyo omu mazima tihariho mutaano omu birimu nari shi omu nyegyesa. Nangwa nitubaasa kuhendera ngu Ruhanga aikirize emizingo y'ebihandiiko eherize obwire bukuye ezoirwe hamwe n'ebihandiiko ebihandiikirwe juba by'emizingo eshangirwe neemanywa kutwizira kuhanya amazima g'ebi tushangirwe twine. Kandi nitushanga ngu abahinduzi n'obu baraabe nibahondana bonka na bonka, ebihandiiko byo tibirikuhondana.

Hati nooreeba ngu torikubaasa kwegamiza okuvunuura aha kumanya kukuru kw'abeegi barikumanyamu orurimi oru Baiburi ehandikirwemu. Kandi ku oraabe otakeetegyereize eki ahabw'okuba ebiteekateeko byawe bishwekirwe n'emigyenzo hanu hariho eky'okushoboorora kimwe ekirikuhereerukayo. Tihariho orikubanganisa ku Abahandiiki n'Abafarisayo kandi n'abeegi bakuru b'omu mwaka gwa 33 A.D. baabaire nibamanya amateeka g'enkoresa y'orurimi n'amakuru gonyini g'ebigambo ebi Endagaano eya Ira yaahandiikirwemu; kwonka n'obu baraabe baabaire baine okumanya kwingi munonga bakaburwa okushuuruurwa kw'Ekigambo kya Ruhanga ekyaraganisiibwe ekyayorekyeirwe omu Mwana. Kuruga omu kitabo ky'Okutandika kuhika ahari Malaki, Akoorekwa naagambwaho, n'obuheereza Bwe, kwonka nabwo okwihaho bakye abajwereirwe omushana ahabw'Omwoyo, Bakamuteishukiraho kimwe.

Hati twahika aha kuhendera, okuhendera oku tushangirwe twaboine omu Kigambo. N'obu turaabe nitwikiririza omu kugyezaho kusherura emizingo y'ebitabo eya ira munonga kandi erikukirayo oburungi, tihaine obu turitunga okumanya amazima g'Ekigambo ahabw'okwega kandi n'okugyerageranisa Ebyahandiikirwe, n'obu twakuba tumaririire tuta. NIKIZA KWETAAGISA OKUSHUURUURIRWA KURUGA AHARI RUHANGA KUGIRA NGU KYETEGYEREZIBWE. OMU BWIJWIRE EKYO NIKYO PAULO YAAGAMBIRE ATI, "NIBYO TUGAMBA, TUTARIKUBIGAMBISA BIGAMBO EBYEGYESIBWA N'OBWENGYE BW'ABANTU, KUREKA EBYEGYESIIBWE OMWOYO," I Abakorinso 2:13. Okushuuruurwa okw'amazima ni Ruhanga orikuvunuura Ekigambo Kye naahanya ekyaraganisiibwe.

Hati hatagira omuntu weena owaahabisibwa ahabw'ebi naagamba akateekateeka ngu tindikwikiriza ngu Ekigambo oku tukiine hati tikiikire. Niinyikiriza ku Baiburi egi ehikire. Yesu akahamiza kimwe Endagaano eya Ira obu Yaabaire ari hanu omu nsi kandi ekahandiikwa omu buryo bumwe nk'oku Endagaano yaitu Ensyia yaahandiikirwe. Otagira enshobi ei waakora ahari eki, ebiro ebi twine Ekigambo kya Ruhanga ekitarikuremwa kandi tihariho muntu n'omwe orikubaasa kwehanga kukicwaho n'obu kwakuba kuyongyeraho. Kwonka nitwetenga Omwoyo ogwo omwe owaakihaire, okukitwegyesa.

Oo, ka nitwetenga Omwoyo kutushuuruurira. Titurikwetenga Baiburi nsya, titurikwetenga okuhindura kusya, n'obu bimwe biri birungi munonga, kandi tindikubihakanisa, KWONKA NITWETENGA OKUSHUURUURIRWA OKW'OMWOYO. Kandi Ruhanga asiimwe, nitubaasa kutunga ekiturikwetenga, ahakuba Ruhanga naayenda kutushuuruurira Ekigambo Kye naarabira omu Mwoyo We.

Ka Ruhanga ahabw'Omwoyo We atandikye kutuheereza okushuuruurirwa okurikugumizamu kuha amagara kandi okurikusingura. Oo, kuri ekanisa neebaasa kutunga okushuuruurirwa kusya kandi ahabw'okwo kushuuruurirwa ekahinduka Ekigambo kya Ruhanga ekihuriire ekyorekirwe, obwo tukaakozire emirimo mikuru munonga kandi tuheereza ekitiinisa Ruhanga Tataitwe ori omu iguru.

OWAATUKOMOROIRE OMU BIBI

Okushuuruurwa 1:5

“Ogwo otukunda, kandi (owaatwogizeho) omu bibi byaitu n'eshagama Ye.”

Ekigambo “owaatwogizeho” buzima nikimanyisa “owaatukomorore” - “Owaatukomorore omu bibi byaitu n'eshagama Ye.” Ekyo t'eky'okutangaaza? Kwonka noota omutima aha by'omwoyo? Waakikwata? Ekaba eri eshagama Ye WENKA eyaatukomorore kyarimwe kuruga omu bibi byaitu. Ekaba etari shagama y'omuntu. Ekaba eri eshagama ya Ruhanga. Petero akagyeta eshagama ya Kristo. Paulo yaagyeta eshagama ya Mukama,

kandi eshagama ya Yesu. Ti bantu bashatu, kureka n'omuntu OMWE. Nkukwo okwo kushuuruurirwa ogundi murundi, Ruhanga OMWE. Ogwo Yehova Ruhanga Ow'obushoborozi bwona akashuuma omu nsi kandi Yaayekorerera omubiri kurabira omu mwishiki oshugaine yaagutuuramu, kugira ngu ebaase kuba eshagama ya Ruhanga ey'okutuhindura ab'obusingye (kutukomororerera kimwe) okuruga omu bibi byaitu kandi atumurikye tutaine ibara omu maisho Ge n'okushemererwa kwingi munonga.

Okaayenzire eky'okureeberaho eky'omu Ndagaano eya Ira? Reka tugarukyeyo omu Kibanja kya Edeni. Obu amakuru g'okubanza gaahika omu iguru ngu omutabani, Adamu, agwire omu kibi, Ruhanga akatuma maraika? Akatuma omwana? Akatuma ondiijo orikushushana naitwe? Ngaaha, Akeizira WE WENKA kucungura ogwo mutabani owaagwire omu kibi. Haleluya! Ruhanga tarakwatsize puraani y'okujunwa ondiijo muntu. Akeeyesiga We wenka. Ruhanga akahinduka omuntu yaatuura naitwe atyo yaatucungura naatwegarurira. Tujunwa "ahabw'eshagama ya Ruhanga." Ruhanga otahwaho akatuura omu mubiri gw'omuntu ofa kwenda ngu abaase kwihaho ekibi. Akaba Omwana gw'Entaama kwenda ngu asheeshe eshagama Ye atyo atahe omunda y'omukingo nayo.

Teekateeka ahari eki. Obu eri eshagama ya Ruhanga, n'eshagama ehikiriire; kandi eshagama ehikiriire ku eraabe neetukomoorora kuruga omu maani n'obukwatwa kandi n'okushiishwa ekibi, obwo okukomoorora kuhikire kandi kwijwire. N'ahabw'ekyo hati tihakiriho rubanja.

"N'oha orirega entoore za Ruhanga? Ni Ruhanga, haza kandi obaihaho orubanja? (omanyisa ku turi abahikiriire). N'oha oribacwera orubanja rw'okubasinga? Ni Kristo Yesu owaabafeereire . . ."

Abarooma 8:33, 34.

Nkikyoo aho, okufa Kwe kukatuheereza eshagama. Eshagama etukomoroire. Hati tihakiriho orubanja. Nirubaasa ruta kubaho? Tihariho kintu ky'okutusingisa orubanja, ahabw'okuba egyo shagama etukomoroire kuruga omu kibi. Turekwirwe, titwine rubanja. Otahurikiza omuntu; hurikiza Ekigambo. Okomoroirwe n'eshagama.

Hati otagaruka kubohwa n'emigyenzo n'enyikiriza kandi n'ebibiina by'amadiini. Otahabisibwa habw'okuhurikiza abo abarikwehakana amaani g'Ekigambo kandi bakeehakana ku Yesu ajuna, atamba, aijuza Omwoyo Orikwera kandi n'amaani. Muri abantu ba Ruhanga abarekwirwe, abakomoroirwe n'eshagama Ye wenka. Ku oraabe okitaira okwikiriza kwawe aha nyikiriza z'amadiini n'ebigombe by'amadiini, nikyeyoreka buzima ku okwikiriza kwawe otakikwine omu Kigambo.

ABAGABE N'ABANYAMURWA

Okushuuruurwa 1:6,

"Akaturuhindura (abagabe) n'abanyamurwa ahari Ruhanga We kandi Ishe, Aheebwe ekitiinisa n'obutegyeki ebiro byona. Amiina."

"Akaturuhindura!" Oo, hariho amazima agu turikwetenga kuhamisiriza. Aga ni gamwe aharigo. WE! AKATURUHINDURA! Okujuna n'omurimo Gwe. Okujuna n'okwa Mukama. Kwona n'embabazi. Akatucungura ahabw'ekigyendererwa. Akatugura ahabw'ekigyendererwa. Turi abagabe, abagabe b'omwoyo. Oo, nituza kuba abagabe omu nsi Nawe ku arishutama aha kitebe Kye eky'obukama. Kwonka hati turi abagabe b'omwoyo kandi nitutegyeka obugabe bw'omwoyo.

Omu Barooma 5:17 nihagira hati,

"Ekicumuro ky'omuntu omwe ku kiraabe kyareeteire rufu okwema ahabw'ogwo, okukira munonga abaakiira ezo mbabazi nyingi munonga n'ekiconco ky'okuhikiirira, baryayemekwa omu magara masya ahabw'omwe niwe Yesu Kristo."

Kandi n'omuri Abakolosai 1:13,

"Niwe yaatwihire omu butegyeki bw'omwirima, akatutaasya omu bukama (obutegyeki) bw'Omwana We ou akunda."

Amagingo aga nitutegyeka na Kristo, nitutegyeka ekibi, ensi, omubiri, hamwe na sitaane. Nitworeka okuhimbisibwa Kwe n'ekitiinisa; NAAYEYOREKA, ahakuba ni Kristo omuriitwe, Ayekundiire kandi naakora nk'oku asiimire. Eego, buzima, na hati tushutami omu myanya y'omu iguru omuri Kristo Yesu.

"Akaturuhindura abanyamurwa." Eego, abanyamurwa Ahariwe, nitutamba ebitambo by'okuhimbisa kw'omwoyo okw'eminwa eshemeziibwe. Nitumara ebiro by'amagara gaitu nk'ekitambo ekirikutaamirana Ahariwe. Nitumuramiza omu Mwoyo n'omu mazima. Nitutonganirira kandi nitushaba. Abanyamurwa n'abagabe ahari Ruhanga waitu. Tiky'okutangaza ensi nikyoo etarikutusoonaasonera kandi turi abantu b'omutaano abarikwezirikira emirimo mirungi. Tugarukire twahangirwa Omuriwe kuba abaana kushushana Tataitwe.

RUHANGA ORIKWIJA

Okushuuruurwa 1:7,

“Reeba, Naija n'ebicu, kandi eriisho ryona Riryamureeba, n'abo Abaamucumitsire; n'enganda zoonza ez'omu nsi ziryaborooga ahabw'okwiya Kwe. Eego, Amiina.”

Naija. Yesu naija. Ruhanga naija. Nabi ogwo naija. Omunyamurwa kandi Omugabe naija. Ogwo BYONA omuri BYONA naija. Nikwo batyo, Mukama Yesu, ija juba. Amiina.

Naija. Naizira omu bicu, ebicu by'ekitiinisa nk'obu Yaareebirwe ari aha Rushozi rw'Okuhindurirwaho, kandi n'ebijwaro Bye bikaba nibyera nibimurinkana obwo amaani ga Ruhanga nigamusangira. Kandi eriisho RYONA Riryamureeba. Eki nikimanyisa ngu oku ti Kutwarwa. Obu nibwo bwire obu Araiziremu kutwara omwanya Gwe oguhikire nk'Omugabe w'Ensi. Obu nibwo abaamucumitsire n'enyikiriza zaabo kandi n'enyegyesa z'ebigombe by'amadiini baricura, obwo n'abantu boona baryaborooga n'obwoba bwingi ahabw'Ogwo Ori Kigambo.

Oku n'okushuuruurwa kw'ebyafaayo bya Zekaria 12:9-14. Zekaria eki akakiraguraho nk'emyaka 2500 ehingwire. Kiri haihi kuhikiirira. Hurikiza.

“Kandi eryo izooba Ndyayehayo kucwekyereza amahanga goona agateera Yerusaalemu. Kandi Ndyashuka aha nju ya Daudi n'aha batwire Yerusaalemu Omwoyo gw'embabazi n'okweshengyereza; ku barireeba (Nyowe) Ou baacumitsire, . . .”

Hati, ni ryari obu Engiri erigarukira Abayudaaya? Obunaku obu obwire bw'Abanyamahanga burihwaho. Engiri eri haihi kugarukira Abayudaaya. Oo, ku naakubaasa kukugambira ekiri haihi kubaho omu biro byaitu ebi. Ekintu kikuru eki ekiri haihi kubaho nikiza kugumizamu kuhika omu kitabo ky'Okushuuruurwa 11 kandi kiiheyo abo bajurizi babiri, abo baanabi babiri, Musa na Eliya, nibagarura Engiri aha Bayudaaya. Tukyeteekatekeyeire. Ekintu kyona kiri omu buteeka. Nk'oku Abayudaaya baareetsire obutumwa aha Banyamahanga, nikwo n'Abanyamahanga buzima baributwara bakabugarurira Abayudaaya, bwanyima Okutwarwa kubeho.

Hati, ijuka ebi twashoma omu kitabo ky'Okushuuruurwa n'omuri Zekaria. Byombi nibiizira kimwe ahanyima y'okubonabona. Ekanisa y'Omujigaijo teriraba omu kubonabona. Ekyo nitukimanya. Baiburi neekyegyesa.

Omu bwire obwo nikipamba ngu Ruhanga naija kushuka Omwoyo We aha nju ya Israeli. Niwe Mwoyo omwe owaashukirwe aha Banyamahanga omu bwire bwabo. “Ku barireeba (Nyowe) Ou baacumitsire, baryamucurira, nk'oku omuntu acurira omwana we omwe nyamunegyere, bamuririre munonga, nk'oku omuntu aririra omwana we w'omujigaijo. Eryo izooba omuri Yerusaalemu haryabamu okucura kwingi okurikwingana n'oku baacuriire Hadadi-rimooni omu ruhita rwa Megido. Kandi ensi eryacura, buri ruganda rucure okwarwo, oruganda rw'enju ya Daudi okwarwo n'abakazi baabo okwabo; oruganda rw'enju ya Nasani okwarwo, n'abakazi baabo okwabo . . .” Kandi buri nju okwayo obu Ariizira omu bicu by'ekitiinisa omu kwija Kwe kwa Kabiri. Abayudaaya abo Abaamucumitsire Baryamureeba nk'oku kirikugamba omu Kyahandikirwe ekindi, “Obwo buhuta bw'omu ngaro Zaawe bukaruga hi?” Nawe aryagarukamu ati, “Omu nju ya banywani Bangye.” Tiburiba bwire bw'amaganya aha Bayudaaya bonka Abaamwangire nka Mesia, kureka buryaba obwire bw'amaganya ahari abo abaritsigara aha Banyamahanga abaamwangire nk'Omujuni w'obwire obu.

Haryabaho okurira n'okuborooga. Abaishiki abashugaine abagwejegyeyire baryaba nibaborooga. Nibashushanisa ekanisa eyaayangire kutunga amajuta (agarikushushanisa Omwoyo Orikwera) omu tabaaza zaabo (ezirikushushanisa omubiri nari ekirikuteebwamu amajuta) okuhitsya obu obwire bwahweireyo. Tikugira ngu bakaba batari bantu barungi. Bakaba bari abashugaine kandi ekyo nikyoreka engyesho nungi munonga. Kwonka bakaba bataine majuta omu tabaaza zaabo n'ahabw'ekyo bakanagwa aheeru ahaabaire hariyo okuborooga n'okunena enshaya.

Reka tushushanise ebi byona omu kitabo ky'Okutandika, eshuura 45, ahu Yosefu arikubugana beene ishe omuri Misri kandi akabeeshuuruurira.

Okutandika 45:1-7,

“Yosefu yaaremwa kwegumya omu maisho ga boona abaabaire bamwemereire haihi; yaagira ati: Ragiira abantu boona bashohore bampigize. Tihaagira muntu weena owaatsigara na Yosefu, omu kwegambira beene ishe. Yaarira naaborooga munonga; Abanyamisri nab'omu nju ya Faraho baamuhurira. Yosefu yaagambira beene ishe, ati: Niinye Yosefu. Tata akibaho? Beene ishe baabura eki baamugarukamu, ahakuba bakashobererwa omu maisho ge. Yosefu yaagira beene ishe ati: Nimbeeshengyereza muunyirire haihi. Baamwirira haihi. Yaagira ati: Niinye Yosefu murumuna waanyu, ou mwagurize kutwarwa Misri. Mbweni mutashaasha, n'obu kwakuba okwegwerwa kubi ahabw'okunguza nkaija kunu; ahabw'okuba Ruhanga niwe yantumire kubabandiza kunu kukiza amagara g'abantu. Ahakuba hati enjara emazire emyaka ebiri omu nsi, kandi hakiriyo endiijo myaka etaano, ei abantu batarihingiramu, n'obu kwakuba okugyasha. Kandi Ruhanga akantuma kubabandiza kunu ngu abakwatire eihembe omu nsi, kandi abajune omu buryo bw'okutangaaza.”

Hati ekyo tikirikushushanisibwa na Zekaria 12 kurungi? Twata ebi bibiri hamwe nituteekwa kukitunga gye buzima.

Yosefu obu yaabaire akiri muto munonga akaba naayangwa beene ishe. Ahabw'enki yaayangirwe beene ishe? N'ahabw'okuba yaabaire ari ow'Omwoyo. Akaba atarikubaasa kwezibira kureeba okworekwa okwo, n'obu kwakuba kwezibira kuroota ebirooto kandi n'okubishoboorora. Ekyo kikaba kimurimu. Akaba atarikubaasa kworeka ekindi kintu kyona kureka ekyabaire kimurimu. N'ahabw'ekyo, beene ishe obu baamwanga bakamutura busha. Kwonka akaba naakundwa ishe munonga. Ishe akaba ari nabi kandi akeetegyereza. Ekyo n'ekirikushushanisa ekihikire kya Kristo. Ruhanga Ishe akaba naakunda Omwana, kwonka beene ishe (Abahandiiki n'Abafarisaayo) bakamwanga ahakuba Akaba naatambira abarwaire, akora eby'amahano kandi agamba ebirikwija kubaho, areeba okworekwa kandi akushoboorora. Egyo ekaba etari nshonga y'Okumwanga kwonka bakakikora, kandi nka beene ishe ba Yosefu, Bakamwangira busha.

Hati ijuka oku abo batabani ba Yakobo batwaize Yosefu. Bakamunaga omu kiina. Baatwara ekanzu ye y'amabara maingi ei ishe yaabaire amuhaire baagijabika omu shagama kureetera ishe kuteekateeka ngu omwojo ogwo haine enyamaishwa emwitsire. Bakamuguza abashuubuzi b'abantu abaamutwairwa Misri kandi okwo yaagaruka yaaguzibwa omwe aha bakuru b'engabo. Muka mukuru w'engabo akamukomeseza busha omu kihome, kwonka ahanyima y'obwire okubaasa kwe nka nabi kukareetera Faraho kumutaho omutima kandi yaatungurwa kuza aha mukono gwa buryo gwa Faraho n'obushoboorozi bwingi butyo kuhitsya obu haabaire hatariho n'omwe owaabaire naabaasa kwija ahari Faraho atabandize yaaraba ahari Yosefu.

Hati ka tushwijume amagara ga Yosefu obu yaabaire ari Misri, ahakuba ni hanu ahu turikumurebera nk'ekirikushushanisa ekihikire kya Kristo. Obu yaabaire ari omu nju ya Mukuru w'engabo akabeihererwa, yaafubirwa kandi baamuta omu kihome ataine rubanja, nk'oku baakozire Yesu. Okwo omu kihome akashoboorora ekirooto ky'omugabuzi wa viinyo n'omuteeki w'emigaati abo abaabaire bari embohe hamwe nawe. Omugabuzi wa viinyo akakira, kwonka ondiiyo oriya yaacwerwa orubanja rw'okufa. Kristo akateebwa omu kihome aha musharaba, yaatsigwaho Ruhanga n'abantu. Ahari buri rubaju Rwe hakaba hariho omwambuzi - omwe akafa, omu mwoyo, kwonka ondiiyo oriya yaaheebwa amagara. Kandi yetegyereze, Yesu ku yaihirwe aha musharaba, Akakuzibwa kuhika omu iguru kandi hati ashutami aha mukono gwa buryo gw'Omwoyo wa Yehova mukuru; kandi tihariho muntu orikubaasa kwija ahari Ruhanga atarabire Omuriwe. Hariho omuteerani OMWE owa Ruhanga n'abantu, kandi Niwe wenka ou orikwetenga. Tihariho ba Mariya nari abahikiriire, kureka Yesu wenka.

Twagumizamu n'ekirikushushanisa eki ekiturikushanga omuri Yosefu, yetegyereze oku buri kintu eki yaabaire akora omuri Misri kyabaire kiheebwa omugisha. Omurimo gwe ogw'okubanza na mukuru w'engabo gukaheebwa omugisha. Nangwa n'ekihome kikaheebwa omugisha. Yesu ku arigaruka, eihamba ry'omusheenye riryarabya ebirabyo nk'ekimuri kya rooza. Niwe "Mwana w'Omugisha." Nk'oku hatariho obusingye na bumwe oburahairwe omugisha nk'obwa Yosefu, nikwo hariho n'obwire obuhairwe omugisha oburikwija omu nsi oburikukira obu ensi eramanyire. Buri omwe omuriitwe naabaasa kushutama ahansi y'omuti gw'omutiini gwe ashekye kandi ayesiime kandi atuure omu kubaho Kwe ebiro n'ebiro. Omu kubaho Kwe harimu okwesiima okwijwire kandi aha mukono Gwe ogwa buryo hariho ebirikushemeza eby'ebiro n'ebiro. Ruhanga ahimbisibwe.

Hati yetegyereze ngu, hoona ahu Yosefu yaabaire aza bakaba bateera enzamba y'okurangirira okwija kwe. Abantu bakaba bateera akaari bati, "Mutsimbire amaju Yosefu!" Omuntu n'obu araabe yaabaire aine eki arikukora, enzamba ku yaabaire eteerwa akaba atsimba amaju. Naabaasa kuba yaabaire naaguza ekintu aha rubaju rw'oruguuto omuri tauni, arikuza kwakiira esente ze, kwonka akaba naateekwa kurekyera aho atyo atsimba amaju enzamba egyo ku yaabaire eteerwa. N'obu yaakuba yaabaire ari omweshongozi w'aha siteegi, nari omuzaani w'emizaano, akaba naateekwa kureka eki yaabaire naakora atyo atsimbira Yosefu amaju enzamba ku yaabaire eteerwa kurangirira okwija kwe. Kandi eizooba rimwe omu biro ebi kyona ekirikutegeyeka obwire kiriyayemerera enzamba ya Ruhanga ku eriteerwa, kandi abaafereire omuri Kristo baryazooka kandi ako kasheeshe buryatagurukana buri obutahwaho nihamurinkana kandi harungi. Obwo ekintu kyona kiriyatsimba amaju, ahakuba kihakandiikwa ngu,

"Nikyo Ruhanga Yaamukuriize munonga, Akamuha Eziina eririkukira amaziina goona, ngu boona abari omu iguru n'omu nsi n'okuzimu batsimbire amaju Eziina rya Yesu, kandi endimi zoonza zaature ku Yesu Kristo ari Mukama, Ruhanga Tataitwe ahimbisibwe."

Abafilipi 2:9-11.

Yetegyereze okundi kushuuruurirwa okw'omuhendo omu kushushanisa oku okwa Yosefu. Yosefu, ku yaabaire ari Misri, akaheebwa omugore w'Omunyamahanga kandi okuruga omuriwe akatunga eka y'abaana babiri, Efuraimu na Manaase. Yosefu akashaba ishe kuheereza omugisha abo booyo babiri. Akabata omu maisho ga Yakobo kugira ngu Manaase, omujigaijo abaase kuba aha mukono gwa buryo gwa Yakobo na Efuraimu aha gwa bumoshu. Yakobo ku yaabaire ari haihi kubaheereza omugisha yaaranisamu emikono ye ogwa buryo gwaza aha muto. Yosefu yaagambira ahaiguru ati, "Ngaaha taata; ogu niwe mujigaijo ori aha mukono gwawe gwa buryo." Kwonka Yakobo yaagira ati, "Ruhanga niwe yaaranisamu emikono yangye." Hanu omu kushushanisa nitureeba ngu omugisha ogwabaire guri ogw'omujigaijo (Omuyudaaya) gukaheebwa omuto (Omunyamahanga) kurabira omu musharaba (emikono erabanisiibwemu) gwa Mukama Yesu Kristo. Omugisha gwija kurabira omu

musharaba.

Abagalatia 3:13,14,

“Kristo akatucungura omu mukyeeno gw'ebiragiyo, obu Yaakyeenwa ahabwaitu, ahakuba kikahandiikwa ngu: Omuntu weena orikuhaniikwa aha muti akyeenwe, ngu ahabwa Kristo Yesu omugisha ogwahairwe Abrahamu guhikye n'aha Banyamahanga, okwikiriza kubone kutuhaisa Omwoyo owaaraganisiibwe.”

Omugisha gwa Abrahamu gukaija aha Banyamahanga kurabira omu musharaba. Abayudaaya bakanga omusharaba; n'ahabw'ekyo, Yesu yaatunga omugore w'Omunyamahanga.

Hati, ka tugarukye aha byafaayo bya Yosefu naabugana beene ishe. Noijuka ngu beene ishe boona tibarazire. Yosefu ekyo akakimanya kandi yaagyemesereza ngu beene ishe boona bareebekye omu maisho ge, kitari kityo akaba atarikwija kubeemanyisa. Aha muheru bakareeta ogwo owaabaire naaburaho, Benyamiini omuto. Akaba ari Benyamiini omuto, owaabaire ari murumuna wa Yosefu wenyini, owaareeteire omutima gwa Yosefu kwakamu omuriro. Kandi Yosefu waitu, niwe Yesu, ku aryaija aha bantu abaarinzire ebiragiyo bya Ruhanga kandi abagarukire Palesitaini, omutima Gwe guryayakamu omuriro. Benyamiini omuto naashushanisibwa na 144,000 y'Abaisraeli kuruga omu nsi yoona abagarukire Palesitaini habw'obucunguzi bwabo. Nibaija kuba beemereire okwo beetegwire Kumwakiira. Ogwo Okumumanya omu buryo obuhikire n'Amagara Agatahwaho. Baryagira bati, “Ogu ni Ruhanga waitu Ou tutuura tutegyereize.” Reero baryareeba Ogwo Ou baacumitsire. Kandi baryaborooga bahahaaze emitima bacwekye entegye babuuzze bati, “Obuhuta obu oburikutiinisa bukaruga nkahi? Kikabaho kita?” Bwanyima baryaborooga kandi barire, buri ka okwayo, buri omwe okwe omu maganya g'obusaasi.

Hati Ekanisa y'Abanyamahanga eryaba erahi obu Yesu ariba Naayemanyisa Beene ishe? Ijuka ngu omugore wa Yosefu n'abaana be babiri bakaba bari omu kikaari, ahakuba Yosefu akaba aragiire ati, “Buri omwe andugyehe; boona mubaihe omu maisho gangye.” N'ahabw'ekyo omugore Omunyamahanga akaba asherekirwe omu kikaari kya Yosefu. Ekanisa y'Abanyamahanga eryaza hi omu kutwarwa? Omu kikaari. Omugore aryaihwa omu nsi. Omugore aryatwarwa okubonabona kwingi kutakabaireho kubugana Mukama we omu kaabunga. Emyaka eshatu n'ekicweka obu ekifubiro ky'ekiniga kya Ruhanga kiriba nikishukwa aha nsi, omugore aryaba ari omu Bugyenye bukuru bw'okugaitwa bwa Kyakiro y'Omwana gw'Entaama. Obwo nibwo Arigaruka, atsigye omugore We omu “nju ya ishe,” obwo Naayemanyisa Beene ishe. Omu bunaku obu, endagaano ya antikristo ei Abayudaaya bariba bakozire na Rooma baryagihenda. Bwanyima Rooma n'abashagiki baayo boohereze engabo zaabo kuhwerekyereza Abayudaaya boona abarikutiina Ruhanga, bakoorobera Ekigambo. Kwonka ku bariba nibaija kurwanisa orwo rurembo n'okurucwekyereza, omu mwanya ahaiguru haryareebekamu akamanyiso k'okwija kw'Omwana w'Omuntu n'amahe Ge g'amaani kuhwerekyereza abo abatwire nibahwerekyereza ensi. Omuzigu yaaheza kugarurwa enyima, obwo Yesu aryaija Ayeyorekye 144,000. Bwanyima y'okureeba emirimo Ye y'okujuna ey'amaani, baryaba baamanya amaani Ge. Kandi nabwo ahabw'okureeba obuhuta Bwe kandi n'okumanya ngu bakaba Baamwangire n'okuhitsya amagingo ago, kiryabareetera kurira munonga ahabw'obusaasi bw'obwoba bwingi n'okutiina, nk'oku na beene ishe baabo aba ira baakozire obu baayemerera omu maisho ga Yosefu, baine okutiina kwingi ngu bakaba nibaza kwitwa. Kwonka nk'oku Yosefu yaagambire ati, “Murekye kwegwerwa kubi. Birigye. Ruhanga akaba abirimu byona. Akakikora kukiza amagara.” Nikwo na Yesu arigamba obusingye na rukundo aharibo.

Ahabw'enki Abayudaaya baayangire Yesu? Ruhanga akaba abirimu byona. Nigwo gwabaire guri omuhanda gwonka ogu Yaabaire naabaasa kwihayo omugore w'Omunyamahanga. Akafeera aha musharaba kukiza amagara g'Ekanisa y'Abanyamahanga.

Hati aba 144,000 tibili omu mugore. Omu Kushuuruurwa 14:4 nibetwa abashugaine kandi bakurata Omwana gw'Entaama ei Arikuzi hoona. Obu kiri ngu tibareesiisire n'abakazi nikyoreka ngu ni abakonwa (Matayo 19:12). Abakonwa bakaba bari abarinzi b'ebishengye by'omugore. Bakaba bari abaheereza. Yetegyereze ngu tibarikushutama omu kitebe ky'obukama kureka bari omu maisho g'ekitebe ky'obukama. Ngaaha, tibili omu mugore, kwonka baryaba omu butegyeke bwa Kristo bw'ekitiinisa bw'emyaka rukumi.

Kandi nitureeba ngu Abaisraeli aba ab'aha muheru ku bariheza kuteeranira ahari Mukama omuri rukundo, kandi omuzigu yaaherize kucwekyerezibwa, Ruhanga aryatebeekanisa orushozi Rwe orurikwera, Ekibanja Kye kisya ekya Edeni ahabw'omugore n'Abe kandi n'abaheereza Be n'ab'omugore ahabw'okwaraama kw'emyaka rukumi omu nsi. Nk'oku Adamu na Haawa baabaire bari omu kibanja kandi batamaremu emyaka rukumi, hati Yesu Adamu waitu ow'aha muheru, na Haawa We (Ekanisa y'Amazima) baryahikiriza puraani ya Ruhanga yoona.

Oo, Baiburi ka neyegarukamu. Ekyareebirwe ahari Yosefu na beene ishe kiri haihi kuba kyagarukwamu, ahakuba Yesu naija juba.

Kandi turikuza kureka eky'okushushanisa kya Yosefu, hariho ekindi kintu kimwe eki ndikwenda kubooreka ekirikukwata aha bwire obu obw'aha muheru. Noijuka ngu Yosefu ku yaayemereire omu maisho ga beene ishe Benyamiini obu yaabaire atari nabo Yosefu akaba naagambirirwa omuhinduzi n'obu yaabaire naamanya Oruheburayo kurungi. Akagamba na beene ishe omu rurimi orundi. Noomanya ngu Obusingye bw'Abanyamahanga obw'okubanza (omutwe gw'enzaabu, Obusingye bwa Babuloni) bukahwaho n'obutumwa

bw'omu “ndimi” buhandikirwe aha kisiika? Obusingye obu nibuza kuhwaho omu muringo nigwo gumwe. Okukanya “kw'endimi” omu biro ebi n'ekirikwongyera kuhamya ku Obwire bw'Abanyamahanga buhwere kandi

Ruhanga naagarukira Israeli.

Naija juba. Alufa na Omega, Nabi, Omunyamurwa kandi Omugabe, Byona omuri Boona, Mukama Ruhanga w' Amahe, naijajuba. Eego Mukama Yesu, Ruhanga Omwe kandi ow' Amazima Wenka, ija juba!



www.messagehub.info

Obutumwa obu bukabuurirwa
William Marrion Branham
“... omu biro by'eiraka ...” Kush 10:7